


HEBREUX, KAPU MOSI

 Mpe samu na kupesa mwa. . . Mu banza ti ya kele ve na kima ya kulutila mbote, samu na munu, kasi kaka Ndinga. “Lukwikilu ke kwizaka na nzila ya kuwa, mpe kuwa Ndinga ya Nzambi.”

² Na Bilumbu ya tatu, mpe mu banza na Balumingu, mosi ya balukutakanu ya Lumingu, samu na kupesa kaka pasteur mwa ntangu ya kupema, yina yandi fwana kuzwa, mpe mu banzaka ti beto ke baka kaka Buku mosi na kati ya Biblia. Beto vwandaka kusala yawu, mpe bantangu yankaka kuvwanda mvula mosi na zulu ya yawu.

³ Mu ke bambuka moyo mbala mosi beto vwandaka mvula mosi ya kukangama na zulu ya Buku ya Apocalypse. Kasi, oh, la la, bima yina beto longukaka, mpe mutindu mbote ya vwandaka! Na manima beto vutukaka mpe bakaka Buku ya Daniel, to Buku ya Genèse, to ya Exode, mpe kubakaka yawu, kapu na manima ya kapu, mpe ya kangaka kaka Biblia ya muvimba kintwadi. Oh, mu zola kaka yawu!

⁴ Na mwa ntangu na ntwala, beto ke zola kubaka. . . Kana Mfumu kulandila na kusakumuna mpe ti beto kukwenda na ntwala, beto ke kota na mwa bima ya mudindu mingi na kati awa, kieleka ya mudindu mingi. Mpe beto ke kwenda kaka sika na sika, na nzila ya Masonuku, na yawu.

⁵ Mpe mu ke zolaka kusala ti Masonuku kufwanana na Masonuku. Ya kele mutindu yina ya fwana vwanda. Ya kele kaka kizizi mosi ya nene ya kitoko. Mpe na kati ya Buku yayi yina beto ke na kulonguka, beto ke kota na kati, oh, mpulusu, mpe kubeluka ya Kinzambi, mpe bimangu, mpe mawa. Mpe, oh, nyonso ke kwiza na kati awa.

⁶ Mpe ya lendaka vwanda na ntangu mu ke kuma kisika mosi yina mu fwana kukwenda na balukutakanu. . . Mu ke zabaka kaka ve ntangu mu ke kwenda samu na kuvwanda na lukutakanu mosi, kubokila na kukwenda na lukutakanu mosi, samu ti mu kele na kima ve ya kukubika tii mu ke kuwa kaka lutwadusu ya kusala kima mosi. Mpe yina lendaka vwanda ntete na suka, mu lendaka pumbuka na Californie, na Maine to kisika yankaka, kaka kisika Yandi ke bokila munu. Ya kele samu na yina mu ke kubikaka ve banzila ya nene, ya yinda, samu ti mu lenda ve kusala yawu. Minstère ya munu kele ve ya kukangama mutindu yina, mpe ya kele kaka ya kuswaswana.

⁷ Mpe ntangu yayi mu ke kwiza na yinzò kaka samu na kupema fyoti. Mu me zimbisa bakilo yivwa, na balukutakanu yayi me luta. Mpe Mpangi Mercier mpe Mpangi Goad vwandaka me luta, mwa ntangu fyoti me luta, mpe bawu tubaka, “Mpangi

Branham, mu me tala yina nge ke salaka. Nge ke tulaka ntima nyonso na kati ya yawu.”

⁸ Mu tubaka, “Ya ke kaka mutindu yina beno lenda sala mutindu ya kosalu ya mbote samu na Mfumu, ya kele kutula nyonso ya mbote yina kele na beno na ntwala samu na Klisto; ngolo ya beno nyonso, moyo ya beno nyonso, ntima ya beno nyonso, dibanza ya beno nyonso, nyonso yina kele na beno.” Ntangu beno ke sala kima mosi, beno sala yawu mbote to beno sala yawu ata fyoti ve, beno me mona, beno bika yawu kaka swi. Kana beno ke vwanda Muklisto, beno tula nyonso yina kele na beno na Klisto, ya kele, ntangu ya beno, kisengo ya wolo ya beno, kima nyonso ya beno.

⁹ Mu vwanda tala kaka ntwenya ya bakala yayi. Yina kele kento ya nge, Mpangi Burns, mutindu yina, bantwenya ya bakwelani, yina vwandaka bula mpe vwandaka yimba kuna. Mpe—mpe ya kele ve piano, to dyaka orgue, kasi ya kele mutindu mosi ya kosalulu, ba ke sala kukalata yawu mpe ke fyeta yawu, mpe ke sala kima mosi samu na Mfumu. Mu banza ti beno lenda sala yawu, mpe kuyimba, ya kele, kununga myoyo. Beno sala kima mosi, yawu lenda vwanda nyonso yina. Kana beno—beno lenda kubula sifflet, mbote, mwa sifflet. Beno sala kaka kima mosi. Beno pesa kaka kimbangi to beno sala kima mosi samu na Kimfumu ya Nzambi. Nyonso yina kele na beno, beno tula yawu samu na kosalu ya Nzambi.

¹⁰ Ntangu yayi, beto ke meka ve na kuvwanda yinda mingi, samu ti mu zaba ti beno ke sala. Beno fwana kuvumbuka na suka-suka. Mpe mu ke na kwenda na kuzomba bampandi konso suka. Mu ke tuba kaka na beno kieleka. Ya kele yina mu ke na kusalaka. Ya kele samu na yina mu ke kwizaka na yinzo, ya kele samu na kupema fyoti. Mpe na yawu mu ke vumbuka, pene ya ngunga yiya na suka, mpe ke kwenda na ngaanda na kati ya mfinda mpe, mbote, kuzomba mwa fyoti mpe kukwenda samu na kulala. Mpe mu ke kuzwa dyaka bakilo yina mu me zimbisa, na yawu mu ke pema mbote, na manima ya mwa ntangu fyoti, kana beno . . . Mfumu zola. Mpe nyonso kele mbote.

¹¹ Mbote, ntangu yayi, beto ke luta na Babiblia ya beno. Mu zola beno kunata Babiblia ya beno konso nkokila, ti beno . . . mutindu beno lenda. Kana muntu ke kondwa ndambu, ti muntu zola kulanda bakutanga, beto ke na ndambu awa, beto ke . . . bayankaka ya ba-huissier ke kabula yawu. Muntu zola mosi? Mbote, beno telemisa kaka diboko ya beno.

¹² Mu ke kumiyufula kana Mpangi . . . Doc, kwiza awa mpe baka Babiblia yayi. Nge kele ya kutelama pene-pene kuna, mpe Mpangi Burns. Ya kele kieleka, Burns? Mu ke kuwa yandi kutuba . . . [Mpangi-bakala me tuba, “Conrad.”—Mu.] Yinki? [“Conrad.”] Conrad. Mu vwandaka me bokila yandi . . . Mu me kuma na mutindu ya mpasi na kuwa, mu banza, Mpangi Neville.

Wapi mutindu mu me kuzwa nkumbu ya Burns? Mu zaba kizizi ya muntu, mpe mu lenda kaka ve, lenda ve kubokila nkumbu ya yandi.

¹³ Mpe beno zaba, na yina beno ke na kukuma ya kukula fyoti, mu me tala kima mosi, ya kele mpasi samu na munu na kutanga Biblia yayi. Mpe mu ke yinaka kaka na kubanza na kulwata maneti, samu na kutanga Biblia.

¹⁴ Kasi, awa ntama mingi ve, mu vwanda banza ti mu vwandaka kuma mpofu. Mpe mu kwendaka na kumona Sam. Mpe Sam tubaka, “Bill, mu zaba ve.” Yandi tubaka, “Mu ke kuzwa nge kaka dilaka na muntu ya spécialiste mosi.”

¹⁵ Mu kwendaka na Louisville. Ya zolaka vwanda luzolo ya Mfumu. Spécialiste mosi ya kuzabana; mu me zimbana nkumbu ya yandi ntangu yayi. Kasi yandi tangaka buku ya munu. Mpe yandi tubaka, “Kana nge zola dyaka kuvutuka na Afrika, mu zola kukwenda na nge.” Yandi tubaka, “Mpe kana nge. . . Bantu yayi ya Afrika kuzola nge.” Mpe yandi tubaka, “Ba kele na lukwikilu mingi ya luvunu, ya kulutila na mbele, na kusala bakuzenga. Na yawu,” yandi tubaka, “Mu zola kupesa bangonda sambanu ya luzingu ya munu, samu na kusala bakupasula ya cataracte mpe bima, na . . . na bilanga ya kumwangisa nsangu.” Mpe yandi tubaka, “Kana beto lenda kwenda kintwadi, mpe ti nge lenda kuzwa lemvo ya bawu, mutindu yina,” yandi tubaka, “kuna kana ba kele na ba-cataracte mpe ke na nsatu ya nkisi ya meso,” yandi tubaka, “Mu ke zola kaka kupesa yawu, ya mpamba, bangonda sambanu.” Mpe mu me zimbana bilumbu yikwa beno fwana vingila samu na kuzwa dilaka na yandi.

¹⁶ Mpe beto vwandaka ya kuvwanda na mwa kivinga mosi mpe ya vwandaka na mwa—mwa mwinda mosi ya mbwaki me kupela, kuna na kati ya kivinga ya mpimpa. Mbote, mu vwanda lenda kutanga bisono yango. Ya vwandaka tuba makumi zole-makumi zole. Mu vwanda lenda kutanga yawu na mutindu nyonso. Mpe yandi me yidika yawu na kumi na tanu-kumi na tanu, mpe mu vwanda lenda na kutanga yawu. Mpe me tula yawu na kumi-kumi, mpe mu vwanda lenda kutanga yawu. Yandi tubaka, “Mbote, ya kele ve na yimbi mingi na meso ya nge.”

¹⁷ Na yawu yandi vwandaka na mwa télescope. Yandi me tula mwa kima mosi na manima kuna, mwa kima mosi ya fyoti, beno zaba. Ba-télescope yango ya ntama, bantu yikwa ke bambuka moyo na yawu? Beto vwanda talaka na nzila ya yawu, kutala bafoto, kaka mutindu yina. Mpe yandi tubaka, “Nge lenda tanga yawu?”

Mu tubaka, “Yinga, tata.”

Yandi tubaka, “Tanga yawu samu na munu.”

¹⁸ Ya ke na, oh, kapu ya muvimba, na kutala mutindu *yina*. Mu bandaka, kutanga yawu; yandi bandaka na kubenda yawu na zulu, mutindu *yina*, ya vwanda kuma fyoti mpe fyoti. Yandi

kumaka na kutala mutindu *yayi*, mu telamaka. Yandi tubaka, “Mu lenda tuba kima mosi na nge, nge me luta makumi yiya.”

Mu tubaka, “Yinga, ya kele kieleka, dyaka mingi.”

¹⁹ Yandi tubaka, “Wapi mutindu nge me sala yawu?” Yandi tubaka, “Disu ya muntu, landila kimuntu, ntangu beno ke lungisa bamvula makumi yiya, mutindu nsuki ya nge ke kuma mpembe, mpe nyonso yina, disu na yandi mosi ke patama.” Yandi tubaka, “Ntangu yayi, kana nge zinga bilumbu mingi dyaka, ya ke vutuka.” Yandi tubaka, “Ya kele kutala ya zole, mutindu ba ke bokilaka yawu. Kasi,” yandi tubaka, “muntu, pene ya bamvula makumi yiya, na kieleka bawu ke . . .” Yandi tubaka, “Ya kele ve na kima ya yimbi na meso ya nge.”

²⁰ Mu lenda—mu lenda monadisuki kana ya vwandaka ya kubwa na ntoto, kana ya kele ntama na munu. Kasi ya me kuma pene-pene na munu. . . Mpe yandi tubaka, “Ntangu yayi, nge tanga Biblia ya nge,” yandi tubaka, “nge pusa yawu ntama na nge.” Yandi tubaka, “Na manima ya mwa ntangu fyoti, diboko ya nge ke kuma dyaka ve yinda mingi, tii nge ke lenda ve—ke lenda ve kunata yawu ntama mingi kuna samu na kusimba yawu.”

²¹ Mpe na yawu yandi me salila munu bineti, mpe kisika ya yisi beno lenda, ya kele samu na kutanga. Yandi tubaka, “Ntangu yayi, na zulu ya chaire ya beno. . .” Yandi vwandaka banza ti mu vwandaka mosi ya milongi yayi ya kulunga, beno zaba. Mpe na yawu yandi tubaka ti . . . nge. . . Kisika ya zulu kele kaka tala-tala ya nela ya mpamba, tala-tala ya mpamba. Mpe kisika ya yisi ke na mwa mutindu ya kima ya mutindu yankaka na yawu, ti mu lenda tanga yawu pene-pene, beno zaba, mutindu *yina*. Na yawu mu ke zolaka kaka ve kulwata yawu; kieleka ve.

²² Mpe ntangu yayi, na malongi ya Biblia, mpe mu ke na Ngwisani ya Malu-malu na nkokila yayi. Na yawu ya kele. . . Mu ke na Ngwisani ya Malu-malu ya Collins mpe ya kele na bisono ya nene ya mbote. Kasi ntangu yayi, ntangu mu ke vutuka na yankaka yina, mu—mu lendaka baka maneti yango ya ntama, mpe—mpe mutindu kutanga na yawu. Kasi ata nyonso yina ya kele, mu—mu kele na kyese ti mu ke na kima dyaka samu mu—mu tanga. Mpe—mpe—mpe nyonso yina kele na munu, mu ke pesa muntu nyonso nyonso yina mu lenda, samu na lukumu ya Nzambi, na kivuvu ti Yandi ke katula kidimbu yango ya bununu. Mu lenda lomba Yandi ve na kukatula bununu ya munu. Mu. . . Yinga, ya kele kaka kima mosi yina beto nyonso fwana sala. Beto fwana luta na yawu. Mpe mu zaba ti mu kele dyaka ve mwa mwana ya bakala mutindu mu vwanda vwandaka, yina vwanda telama awa na estrade. Mu me kuma na bamvula makumi yiya na nana. Mpe beno banza kaka, na bamvula zole, mu ke vwanda na makumi tanu, Mpangi Mike.

²³ Oh, mu lenda kwikila yawu na mpasi! Mu kaka. . . Mu vwanda zaba ve ti mu lutaka makumi zole tii pene ya bamvula

zole me luta. Ya kele kieleka. Ya kele kieleka. Mu kaka . . . Mu vwanda lenda ve kukwikila yawu. Mpe dyaka mu—mu . . . Ya me vwanda mpasi samu na munu na kukwikila tii mu kutalaka na kitala-tala, mpe kuna mu—mu me zaba ti ya kele, kuna. Kasi—kasi kaka na kutala, mu ke kumitala kaka mbote mutindu mu vwanda kuwa na luzingu ya munu, mpe mu ke vutula matondo na yawu, mpe. Lukumu nyonso kuvwanda na Nzambi.

²⁴ Ntangu yayi, beto ke longuka Buku ya Hébreux. Ya me vwanda . . . Oh, ya kele mosi ya Babuku ya kati mingi, ya ntalu mingi ya Biblia. Mu ke tuba na beno, ya kele Buku mosi yina tsyelika ke . . . Kana Nzambi pesa muswa, mpe ti beto kota na yisi na kati ya yayi, mu ke kwikila ti beto ke mona bima ya wolo tii beto ke boka kaka mikembo ya Nzambi ntangu nyonso. Mpe ntangu yayi mu . . .

²⁵ Buku ya Hébreux, tsyelika yina Yawu kele, Yawu fwana vwanda ya kusonama na Santu Paul, kibangudi ya kulutila nene ya Biblia, mu banza, yina yinza me kuzwaka ntete, na ngaanda ya Mfumu ya beto Yesu Klisto. Mpe Paul vwanda kabula . . . Ntangu yayi, Paul wandaka mulongisi ya Biblia ya kieleka; yina kele, Ngwisani ya Ntama. Ya kele kaka Buku yina wandaka ya kusonama kuna, na nkumbu Biblia. Mpe yandi vwanda meka na kulakisa ba-Hébreux, na kuswasikisaka Ngwisani ya Ntama mpe kulakisaka ti Ngwisani ya Ntama kele kivudi to kifwanukusu ya Malu-malu.

²⁶ Kaka kuna beto lenda tala nzila na yinzo mpe kuvwanda bangonda tatu kaka kuna na zulu ya dibanza mosi yina, kaka kuna. Samu na kuvutuka manima, kana beto lenda luta na Babiblia ya beto ntangu yayi, samu ti beto kele na Hébreux, kapu ya 1. Kasi kana beto luta na Apocalypse, kapu ya 12, beno ke mona dyaka yawu na mutindu ya kulunga, mutindu bivudi. Kana . . . beno bayina ke na bilapi ya beno mpe ke sonika Masonuku. Na Hébr- . . .

²⁷ Na Apocalypse 11, beto ke mona ti Jean, na kisanga ya Patmos, kumonaka kento mosi ya kutelama na kati ya mazulu, mpe yandi wandaka na mwini na yintu ya yandi mpe ngonda na yisi ya makulu ya yandi. Mpe kento wandaka na misongo, ya mwana ya kubuta. Yandi butaka mwana ya bakala. Dalango ya mbwaki kutelamaka, samu na kudya mwana ntangu kaka yandi zolaka butuka. Mpe ba zangulaka mwana na Mazulu, mpe kento kimaka na ntoto ya kuyuma kisika ba dikisaka yandi ntangu mosi, ntangu, mpe ndambu ya ntangu, to kukabuka ya ntangu.

²⁸ Ntangu yayi, kento vwanda monikisa dibuundu, mpe Mwana yina yandi kubutaka wandaka Klisto. Ngonda na yisi ya makulu ya yandi wandaka musiku, mwini na yintu ya yandi wandaka lemvo. Bambwetete kumi na zole na yimpu ya yandi ya kimfumu wandaka bantumwa kumi na zole. Mpe ya kele kisika, na yina . . . Bantumwa kumi na zole wandaka nkembo

to mbieka ya Ngwisani ya Malu-malu. Beno me mona? “Samu ti ata lufulu yankaka lenda tulama kuluta yina kele yimeni.” Beno me mona? Yawu, Lufulu, Ngwisani ya Malu-malu, bantumwa, Malongi ya bantumwa, mpe nyonso yankaka, kele lufulu ya kukanga ya Ngwisani ya Malu-malu. Mpe kuna na . . .

²⁹ Ngonda kele kivudi ya mwini. Mwini ke pesa kaka nsemo ya yawu ntangu ya kele na manima ya ntoto. Mpe ngonda ke pesaka nsemo, samu na kutambula na mpimpa. Mpe wapi kizizi ya kitoko kele na beto awa, kizizi yankaka ya kitoko: mwini ke monikisa Klisto; ngonda ke monikisa Dibuundu. Ba kele kaka mutindu bakala na kento. Mpe na kuvwandaka ntama ya Klisto, Dibuundu ke pesa Nsemo na fyoti, Nsangu ya mbote. Mpe ya—ya kele Nsemo samu na kutambula tii Mwana ke vumbuka dyaka, kuna Dibuundu mpe Mwana, ngonda mpe mwini, ke vukana kintwadi. Beno me mona? Ngonda kele kitini ya mwini, mpe Dibuundu kele kitini ya Klisto. Mpe na kuvwandaka ntama ya Klisto, Dibuundu ke pesa Nsemo ya Yandi. Mpe kuna kieleka mutindu beto lenda mona ngonda kupesa nsemo, ya zaba ti mwini ke na kupesa nsemo kisika mosi. Mpe ntangu nyonso yina Dibuundu ke pesa Nsemo ya Klisto, Klisto kele moyo kisika mosi. Amen. Beno banza na yawu.

³⁰ Ntangu yayi, musiku vwandaka kifwanukusu ya lemvo, kasi musiku vwandaka ve na ngolo ya kuzwa mpulusu na kati ya yawu. Musiku kaka vwandaka . . . Musiku vwandaka pulusu. Pulusu ke tula beno na boloko, kasi, beno me mona, ya ke lomba lemvo samu na kubasisa beno na boloko. Beno me mona?

³¹ Na yawu Menga ya Klisto, Nsangu ya mbote, me kuula beto na disumu. Musiku salaka kaka beto misumuki. Musiku kaka tubaka, “Nge kele musumuki. Nge fwana yiba ve. Nge fwana sala ve kinsuza. Nge fwana pesa ve kimbangi ya luvunu.” Beno me mona? Ya kele pulusu yina ke tubaka nge me sala yimbi mpe nge kele muntu kufwaka musiku. Kasi Nsangu ya mbote kele bansangu ya mbote. Klisto kufwaka samu na kuvulusa beto na masumu, na kumangaka kutumama na musiku. Klisto kufwaka samu na kubasisa beto.

³² Ntangu yayi, Paul, kaka na ntangu yandi vutukaka na nzambi, yandi kwendaka yufula ve na seminere mosi, to dyaka ti yandi kwendaka yufula mulongi mosi. Kasi beno me tala? Yandi kwendaka na Arabie, mpe vwandaka kuna bamvula tatu, na Arabie. Ntangu yayi, yayi kele, landila dibanza ya munu, ti . . .

³³ Ntangu yayi, beto fwana kuzwa yisi ya dyambu yayi, na yawu beto ke zaba mutindu mfunu ya kele. Mpe lesu ya ntete, na nkokila yayi, beto ke baka yisi ya beto.

³⁴ Ntangu yayi, Paul vwandaka mulongisi mosi ya Biblia, samu ti yandi kulongokaka na yisi ya mulongisi ya nene, ya ntangu nyonso ya lukumu Gamaliel. Mpe yandi vwandaka mosi ya kulutila mbote ya kuzabana na kilumbu yina, mulongisi ya nene

yina ya musiku mpe baprofete. Na yawu, Paul kulongokaka mbote na bima yango.

35 Mpe kuna mu zola yandi mutindu yayi, luzayikisu ya nene yayi, na kuvwandaka ya kusungama na ntima ya yandi, muntu ke fwaka bantu, yina ndimaka lufwa ya Étienne mpe monaka Étienne kufwa na yisi ya matadi mpe bantoto kubula tii lufwa. Mu banza ti ya zolaka ningisa Paul ntangu yandi kumonaka Étienne kutelemisa maboko ya yandi na Mazulu, mpe kutuba, “Mu ke mona Mazulu kufunguka. Mu ke mona Yesu ya kutelama na diboko ya bakala ya Nzambi.” Mpe yandi tubaka, “Tata, kutula ve disumu yayi na zulu ya bawu.” Mpe yandi me lala.

36 Beno me tala yawu? Yandi kufwaka ve. Yandi kulalaka. Kaka mutindu. . . Mu ke kwikila ve ti yandi kuwa ditadi yankaka. Kaka mutindu mwana na kivumu ya mama ya yandi, kulalaka, Étienne kulalaka na maboko ya Nzambi.

37 Ya kele na kima mosi, na yina me tala Paul, yina ningisaka yandi. Kuna yandi, mutindu muntu nyonso na yisi ya kundima, na kumekaka na kunwana na Yawu, yandi me kwenda na nganga-Nzambi ya mbuta mpe samu na kuzwa mwa mikanda. Yandi tubaka, “Mu ke kanga bantu nyonso yango yina ke na kusala makelele nyonso yina, mpe ba-eretiki yina;” yina ba vwandaka tala, yina beto lendaka bokila bubu yayi, “fanatiki ya misiku” mosi, to kima mosi mutindu yina, yina ke na kusala makelele mingi mpe yina ke na kusala muvusu. “Beto ke kwenda kaka kuna mpe kusukisa dyambu.”

38 Mpe na nzila ya yandi kuna, na zulu ya mwa. . . nzila ya nene ve mutindu beto ke zyetaka. Mpe banzila ya bawu na Palestine, kaka mutindu mwa banzila ya fyoti, mutindu nzila ya ngombe na nzila ya bayinti kisika ya bitwisi, mpe mameme, mpe bampunda, mpe bambuluku, mpe bakamela, kwendaka na zulu ya myongo.

39 Mpe Paul, na nzila ya yandi na Damas, pene ya midi, kilumbu mosi, Nsemo mosi ya nene me kupela mutindu mwini mpe me losa yandi na ntoto. Muntu ve kumonaka Yawu kasi Paul. Mu zola beno kutala yawu. Mpe kaka awa, yayi kele ve landila munu, kasi kaka samu beto kuluta na kati ya yisi yayi. Samu beno zaba Yesu mosi yango. . .

40 Ntangu yayi, ntangu Yandi vwandaka awa na zulu ya ntoto, Yandi tubaka, “Mu me katuka na Nzambi, mpe Mu ke na kuvutuka na Nzambi.”

41 Ntangu yayi, ntangu Yandi twadisaka bana ya Israël, Yandi vwandaka Dikunzi ya Tiya. Mpe Yandi kumaka muntu, na manima Yandi vutukaka na Dikunzi yango mosi ya Tiya. Mpe ntangu Yandi kukutanaka Paul na nzila na Damas, Yandi vwandaka Dikunzi yango ya Tiya, Nsemo yango, beno me mona, Nsemo ya nene. Mpe Paul tubaka, “Nani Yina mu ke na kutalisaka mpasi?”

42 Yandi tubaka, “Mu kele Yesu, Yandi yina nge ke na kotalisaka mpasi,” Nsemo. Oh, Yandi kele ve mbote?

43 Mpe awa Yandi kele, na nkokila yayi, kaka awa na beto. Yandi ke na foto ya Yandi kaka kuna, Kima kaka mosi, beno me mona, Dikunzi ya Tiya, Nsemo, kaka mutindu mosi Yandi vwandaka, “Mutindu mosi mazono, bubu yayi, mpe kukondwa nsuka.”

44 Ntangu yayi bantu yina vwandaka na yandi kumonaka Nsemo yango ve, kasi Yawu vwandaka kuna kaka mutindu mosi. Bandandu vwandaka mutindu mosi.

45 Ntangu yayi, ya lenda salama ti—ti muntu mosi lenda mona Klisto na kati ya yinzo yayi mpe ti muntu yankaka kumona Yandi ve? Kieleka. Ya kusalamaka kuna.

46 Ya kusalamaka mpe mpimpa mosi ntangu Pierre vwandaka na boloko. Mpe Nsemo yango kwizaka na kati ya boloko, mpe simbaka Pierre, mpe me luta kaka na lweka ya mukengi ya kati, mukengi ya ngaanda, me luta mwelo, mwelo ya nene, mpe mwelo ya mbanza. Pierre tubaka, “Mu fwana vwanda ke na kulota.” Kasi yandi me tala bisika nyonso, kasi Nsemo vwandaka me kwenda; Klisto, Nsemo yina Kukonda nsuka, ya mvula na mvula. Yandi yayi. Ntangu yayi, na nzila kuna. . .

47 Mpe beno tala, kima yankaka, kana beto lenda zonza na yayi, ya me kwiza na dibanza ya munu malu-malu yayi. Kasi bantu ya ndwenga yina landaka Mbwetete, nzila nyonso katuka Inde, Orient, bangonda, na kulutaka mabengi mpe bantoto ya kuyuma (kulutaka na ba-observatoire; mpe ba vwandaka landa ntangu ya mpimpa na nzila ya bambwetete) mpe ata muntu ya masolo to muntu yankaka me tubaka ntete ti monaka Mbwetete yango kana bantu ya ndwenga. Ya vwandaka kaka samu na bawu na kumona Yawu.

48 Na yawu beno lenda mona bima yina muntu yankaka lendaka mona ve. Na dibanza ya beno, Yawu kele ya kieleka. Na dibanza ya yandi, ba ke bakula ve. Kaka mutindu ya kuvutuka na Nzambi; beno lenda vwanda ya kuvutuka na Nzambi mpe ke yangalala balusakumunu ya Nzambi, ke kunwa kaka—kaka na balusakumunu ya Nzambi. Mpe muntu yankaka, yina kele ya kuvwanda na lweka ya beno, “Mu ke na kumona kima ve.” Beno me mona? Beno me mona? Kaka yina. “Mu ke na kubakula kaka yawu ve. Mu ke na kumona ve yinki nyonso yayi kele.” Mbote, yandi ke na kubakula kaka Yawu ve. Kaka yina. Kisika, beno kele.

49 Beno tala ntangu yayi, Paul na nzila ya yandi kuna. Mpe na ntangu kaka kimbangi ya nene yayi kusalamaka na yandi. . . Ntangu yayi, yandi vwandaka na kyese ve. . . Ya kele yina ke sala Paul kuvwanda ya mbote mingi.

50 Ntangu yayi, leso ya beto na nkokila yayi kele ve ya kati mingi. Ya kele kinsinsya ke leso, kasi, oh, beto ke kota na kati

mingi, na manima ya mwa ntangu. Kasi yayi kele kinsinsya ya kieleka ya leso, kasi ya ke na kubanda kaka. Mpe yina ya kele, ya kele kima mosi, ya kele kuzangula Yesu Klisto. Paul, na kubanda.

⁵¹ Mpe ntete yandi sala yayi, Paul vwandaka kizabi ya Biblia. Mpe ata mbala mosi ti kizabi ya Biblia ke vwandisa malongi ya yandi na zulu ya banzingulu. Ve, tata. Ata mbala mosi ve ti ba ke vwandisa malongi ya bawu na zulu ya nzingilu. Beno lenda vwanda na konso mutindu ya nzingilu. Kasi ya fwana vwanda **MUTINDU ME TUBA MFUMU**. Kieleka.

⁵² Ntangu yayi, na Ngwisani ya Ntama, ba vwandaka na mitindu tatu ba lendaka zaba nsangu. Ya ntete, musiku, ya vwandaka kaka musiku. Na manima, ba vwandaka na profete; muntu ya bandosi; mpe ba vwandaka na Urim Thummim. Ntangu yayi ya lendaka vwanda mwa kukota mingi.

⁵³ Urim Thummim vwandaka kinkuti ya kisengo yina Aaron vwandaka lwata na ntulu ya yandi. Na kati kuna vwandaka na matadi kumi zole: jasper, sardoine, émerode, mpe nyonso yankaka, na yisi. Ba vwandaka na matadi nyonso ya nene ya kumi zole, yina vwandaka na kati ya kinkuti ya kisengo, na kulakisaka ti yandi vwandaka nganga-Nzambi ya mbuta ya makanda nyonso, makanda kumi zole ya Israël. Kinkuti ya kisengo yayi ya kukangama na zulu ya dikunzi na kati ya dibuundu. Mpe ntangu profete vwandaka pesa profesi, mpe ti ba vwanda zola kundima ti ya vwandaka kieleka, to ve, bapofete to bantu ya bandosi vwanda telamaka na ntwala ya Urim Thummim yayi, mpe yandi vwanda tuba ndosi ya yandi to vision ya yandi, nyonso yina yandi kumonaka. Mpe kana Nsemu ya Santu. . . Oh, beno ke mona yawu? Nzambi ntangu nyonso ke zingaka na kati ya kitezo ya kimpeve. Kuvukana, bansemu yango, vwandaka kaka ya kulunga tii ndinga yayi kuwakanaka. Mpe ntangu ndinga vwanda bula matadi yango, kana ya vwandaka ve ya kimpeve, ya vwanda sala kima ve. Kasi kana ya vwandaka ya kimpeve, Bansemu yango nyonso vwanda lakisa bantinta ya mukyama ya kuvukana. Amen. Kuna, ya vwandaka Nzambi vwandaka zonza, “Yina kele profete ya Munu.” To, “Ndosi yina me katuka na Munu.” Ya vwandaka landila Urim Thummim ti ba vwanda fundisa.

⁵⁴ Beno ke bambuka moyo na Saül ntangu yandi kumaka retrograde? Yandi tubaka ti yandi vwanda lenda ve na kuzwa ndosi. Mpe profete, Samuel, vwandaka me kufwa, mpe ya vwandaka ve na nzila. Yandi tubaka, “Mpe Urim zola kwandi ve kuzonza na munu.” Kima ve. Saül kutelamaka na ntwala ya Urim, mpe bampova ya yandi vwandaka makelele ya kufwa. Beno me mona? Nzambi kumangaka kaka yandi. Mpe Urim Thummim yina, ya vwandaka kusiamisama ya Aaron ya kinganga-Nzambi ya yandi. Na manima Aaron me kwenda,

Moise, kinkuti ya kisengo vwandaka ya kukangama na zulu ya dikunzi.

55 Ntangu yayi, kinganga-Nzambi ya Aaron kusakaka ntangu Yesu kufwaka. Mpe ntangu yayi, na kukabulaka musiku na lemvo, beto ke kaka na Urim Thummim. Mpe Paul vwanda sadila Yawu. Beno me mona? Urim Thummim bubu yayi kele Ndinga ya ke Kufwaka ve, ya Kukonda nsuka, ya mvula na mvula. Beno me mona?

56 “Samu ti muntu nyonso yina ke katula na Buku yayi, to ke bwela kima na Yawu.” Mu zola ve kima na ngaanda ya Yawu, kasi mu zola nyonso yina kele na Yawu. Ya kele Dibuundu yina beto zola. Mpe bima nyonso fwana vwanda ya kulakisa na nzila ya Ndinga.

57 Ya kele samu na yina mu kuyambamaka yimbi ntama mingi ve na kati ya bantu ya Pantekote, samu ti, mu tubaka, “Mu lenda ve kubakula wapi kisika mafuta ke basika na maboko ya beno, to menga kubasika na kizizi ya beno, ti ya vwandaka kidimbu ti beno vwandaka na Mpeve-Santu.” Ya kele Masonuku ve mpe mu—mu vwanda lenda kaka ve kundima yawu. Ya fwana katuka na Ndinga.

58 Mpe ntangu yayi, Paul, yandi vwanda zolaka kaka Ndinga. Na yawu, ntete yandi kupesa kimbangi ya kimbangi ya nene yayi yina yandi kuzwaka, yandi kwendaka na Égypte bamvula tatu. Mu banza ti ya vwandaka bamvula tatu, bamvula tatu kuna na Égypte. Mpe beno zaba yinki mu ke kwikila ti yandi kusalaka? Mu ke kwikila ti yandi kubakaka Ngwisani ya Ntama, mpe me sosa na nzila ya Ngwisani ya Ntama, mpe me tala ti Yawu vwandaka kieleka Mesiya ya kieleka. Yandi zolaka lakisa kimbangi ya yandi na nzila ya Biblia. Amen. Oh, la la!

59 Beno tala yandi ntangu yandi vwandaka na boloko. Beno tala, ya kele na ntangu na luzingu ya Paul ntangu yandi vwandaka na boloko kuna bilumbu mingi. Yandi sonikaka Buku ya Éphésiens. Yandi sonikaka Mukanda yayi ya Hébreux. Beno me mona? Yandi kuzwaka ntangu. Nzambi tulaka yandi na lweka kuna na kati ya boloko, mpe yandi sonikaka Mikanda yayi samu na mabuundu. Mosi na dibuundu ya Éphèse. Yandi sonikaka mosi na dibuundu ya Pantekote, yina vwandaka na mambu mingi na bawu. Yandi kuzwaka mambu mingi na dibuundu ya Pantekote kulutilla na nyonso yankaka. Ya kele dyaka yawu. Kasi yandi kuvutulaka matondo samu na bawu. Kima kaka yandi zolaka longa bawu. . . Ntangu ba vwanda vukana: mosi vwandaka na ndinga, mosi vwandaka na psaume, mosi vwandaka na sensation, mosi vwandaka na kuwa ya nzutu. Yandi zolaka zonza ve, kuzonza na bawu na, “lukengolo ya Kukonda nsuka.” Yandi zolaka ve kuzonza na bawu na, “bayina vwandaka na lukanu ya ntete.” Yandi zolaka zonza ve na bawu, ba vwandaka ba-bébé. Bawu nyonso zolaka—zolaka kutala na

nzutu kima mosi, to kumona kima mosi, to kuzwa bakuwa ya nzutu ya kubaluka, mpe, to kima pene-pene ya bawu, mwa banzikisa.

⁶⁰ Kasi mu ke kwikila, ntangu yandi kuzonzaka na bantu ya Éphèse, yandi zolaka zonza, “Na kuvwandaka na lukanu ya ntete ya Nzambi na kuvwanda bana ya babakala mpe bana ya bakento, mpe ndimaka beto mutindu bana na kati ya Yesu Klisto ntete mbandukulu ya yinza.” Beno tala yawu. Oh!

⁶¹ Beno tala yandi mbote kukuma na Buku ya Romains, mpe nyonso yina. Ba vwandaka ya kukula. Oh, ba vwanda zonza na bandinga, kieleka, mpe ba vwandaka na bidimbu yankaka ya Mpeve-Santu na kati ya bawu. Kasi ba salaka ve bandongosolo, mpe ba-sensation, mpe mwa bakutekita, mpe bansatu ya nzutu ya ngitukulu.

⁶² Paul tubaka, “Beno—beno—beno ke kwenda ntama mingi na yawu. Na yina beno fwana vwanda milongi, beno kele kaka ba-bébé mpe fwana kuzwa miliki.”

⁶³ Ntangu yayi, ya kele yina munu ntangu nyonso ke mekaka na kunwana ti tabernacle yayi kuvwanda, nkonga ya ba-bébé ve. Beto kula. Beto telama na nzila. Oh, la la! Beno bawu yayi.

⁶⁴ Na yawu, Paul kwendaka kuna, na ntete, samu na kumona kana nzingulu ya yandi vwanda fwanakana na Biblia ya Nzambi.

⁶⁵ Oh, ya ke vwanda mbote ve, bubu yayi, kana bantu ke sala kaka yawu dyaka, kana beto ke sala nzingulu ya beto kufwanakana na Biblia ya Nzambi? Kana ya sala ve, kuna nzingulu ya beto kele ya luvunu; ya ke kupesa nsemo ve na Urim Thummim. Kana ya kupesa nsemo na kati Kuna, amen, beno zaba ti beno me kuzwa Yawu. Kasi kana ya sala ve, mosi. . . Mu ke kipe ve mutindu mbote ya ke monana, mutindu kieleka ya ke talana ti ya kele kieleka; kana bansemo yango me pesa nsemo ve na Urim Thummim yango, ya vwandaka luvunu.

⁶⁶ Mpe ata mutindu ya lutangu ya nzingulu beno me kuzwa, mutindu kieleka ya ke monana na kuvwanda, mutindu kutalana ya kele, mutindu ya kulonguka ya kele, mutindu ya kisalulu ya kele samu na kununga myoyo; kana ya ke kupesa nsemo ve na kati ya Ndinga, ya kele luvunu. Kieleka. Ya fwana kutandama na Ndinga.

⁶⁷ Ntangu yayi, mu ke kwikila na. . . ya kele na kati-kati ya nzila. Nzila, ntangu yayi, bambala mingi. . . Mu vwanda kwendaka na dibuundu ya ba-Nazaréen. Mfumu kusakumuna bantu yango ya luzolo. Bantu ya mutindu ya ntama, ba-Méthodiste ya kusantisama kele yina bawu kele; dibuundu ya Nzambi, ba-Nazaréen, Bizyeti ya Busantu, mpe mingi ya mabuundu ya santu ya mbote ya ntama. Mpe ba vwanda yimbaka nkunga mosi:

Mu ke na kutambula na nzila ya nene ya ntama,
 Na kutubaka bisika nyonso mu ke kwenda,
 Mu zola kuvwanda Muklisto ya mutindu ya
 ntama, Mfumu,
 Kuluta nyonso mu zaba.

68 Mbote. Kitoko. Mpe kuna ba vwanda zonzaka na yina me tala nzila ya nene ya busantu. Ntangu yayi, kana beno tanga yawu, ba ke kuzwa yawu na Ésaïe, kapu ya 35. Ntangu yayi, kana beno tala, yandi tubaka, “Ya ke vwanda na nzila ya nene, *mpe* nzila.”

69 Ntangu yayi, *mpe* kele mpova ke vukisa. Beno me mona? Nzila ya nene, ya vwandaka ve nzila ya nene ya busantu. “Ya ke vwanda na nzila ya nene, *mpe* nzila, mpe ba ke bokila yawu, ‘Nzila ya busantu,’” ve nzila ya nene ya busantu. “Nzila ya busantu!” Mpe nzila ya nzila kele kati-kati ya nzila. Ya kele ya kutunga mutindu *yayi* samu ti bamaza kuluta, na balweka nyonso zole, samu na kubika nzila ya kutsema mbote. Kana ve, beno kuzwa mwa bamaza ke kangama na kati ya nzila ya beno, ntangu nyonso, kana ya kele ve ya kutunga mbote. “Nzila” kele kati-kati ya nzila.

70 Ntangu yayi, na lweka *yayi*, ntangu bantu ke vutukila Nzambi, mabanza ya bawu ke vwanda kaka na zulu ya Klisto. Mpe kana ba kele kaka mwa ya mayela mingi, mpe ti ba kangama ve na yisi ya bisambu, ba ke kuma kieleka madidi, mpe ya ngolo, mpe ya kukangama na misiku, mpe ya kuswaswana. Mpe kuna kana ba kele kaka mwa fyoti kidi-kidi, kana beno tala mbote ve, ba ke vwanda kaka ya kukangama na misiku mpe ya bulawu, na lweka *yayi*, beno me mona, ba ke kota na bakuningana ya nzutu mpe nyonso.

71 Ntangu yayi, kasi, Dibundu ya kieleka kele Nsangu ya mbote ya kieleka ya kuvedila, kaka na kati-kati ya nzila. Ya kele ve madidi mpe ya kukangama na misiku, to dyaka ti ya kele bufanatisme. Ya kele Nsangu ya mbote ya kieleka ya mbote, ya ntama, ya tiya, ya luzolo ya Nzambi yina me katuka na kati ya ntima, yina ke na kuluta na kati-kati ya nzila, yina ke na kubokila balweka nyonso zole. Ya kele kieleka. Ntangu yayi ya kele yina . . . Mpe wapi mutindu beno ke kuzwa Dibundu yina? Mbala mosi na Ndinga, Urim Thummim.

72 Ntangu yayi, Paul zolaka kunata dibundu yayi kaka na kati-kati ya nzila, na yawu yandi kwendaka mpe longukaka bamvula tatu na zulu ya Masonuku yina yandi zabaka. Na yawu, Paul kusunikaka kitini ya nene ya Ngwisani ya Malu-malu. Nzambi kuzwaka yandi na kusala yina samu ti nsungi ya Bantu ya makanda vwandaka kwiza. Matthieu, Marc, Luc, mpe Jean, Bansangu yiya ya mbote, ba vwandaka ba-Juif. Kasi Paul kusunikaka mikanda ya kulutila.

⁷³ Ntangu yayi beno tala, ntangu yayi, beto ke banda na kubaka yisi yayi ntangu yayi, kisika yandi kele, ke na kusonika Yawu, na boloko. Mpe yandi kele na kimbangi nyonso yayi. Kasi, na ntete, kimbangi yayi vwandaka ntete ya kulakisa, mpe yayi kele mukanda ya yandi ya ngundi na yawu. Yayi kele mukanda ya ngundi. Romains mpe Éphésiens, mpe nyonso yankaka yina, ke na kisika ya bawu, kasi yayi kele mukanda ya ngundi.

⁷⁴ Ntangu yayi, kapu nyonso ya lte *kele* kukembila Yesu, mpe ke swasikisa Yandi na kuvwandaka profete. Ya kele yintu ya muvimba ntangu yayi. Mu ke meka na kukuma na yawu kaka na nswalu mutindu mu lenda ntangu yayi, samu beto vwanda ntangu ya mpingi ve. Yintu ya muvimba *kele* kuswasikisa ya malu-malu kap-...ya malu-malu...Kapu ya lte *kele* kufwanikisa Yesu na profete nyonso, to musiku nyonso, to nyonso yankaka, mpe kulakisa Nani Yesu kele. Ntangu yayi beno tala, “Nzambi.” Beto ke banda, na mpova ya ntete, “Nzambi.”

Nzambi, na nta-...na bantangu ya ntama...

Ntama zola kutuba na “bilumbu na manima,” na ntangu ya ntama.

...bantangu ya ntama mpe na mitindu mingi kuzonzaka na ntama na batata na nzila ya baprofete,

⁷⁵ Ntangu yayi, beno me mona, “Nzambi, na bantangu ya ntama, na bilumbu na manima, Yandi kuzonzaka na batata na nzila ya baprofete.” Ya kele mutindu Yandi zolaka kupesa Nsangu ya Yandi, na nzila ya profete ya Yandi.

⁷⁶ Nzambi ke fidisa profete ya Yandi mutindu Élie, Jérémie, Ésaïe. Mpe kana beno tala, ata mbala mosi ve na disolo ya yinza, ti dibuundu kubasisaka profete. Beno sosa yawu na Ngwisani ya Ntama, na Ngwisani ya Malu-malu, to na kilumbu yayi, na kilumbu ya suka. Beno lakisa munu profete mosi yina basikaka na dibuundu na kilumbu ya nsuka. Beno lakisa munu mosi yina kwizaka, basikaka. Mpe beno lakisa munu ntangu mosi yina profete mosi, kisadi ya kieleka ya Nzambi, yina ti mutindu ya kusala ya dibuundu ya yinza kufundisaka yandi ve.

⁷⁷ Beno banza kaka na yawu. Jérémie, Ésaïe, nzila nyonso ya Ngwisani ya Ntama, ba fundisaka bawu. Yesu tubaka, “Beno ke bongisa bandyamu ya baprofete mpe ke kumisa yawu mpembe, mpe beno ke tula bawu na kati kuna.” Ya kele kieleka.

⁷⁸ Dibuuundu ke na kulandila na yawu. Beno tala Santu Patrick. Beno bantu ya Katolika beno ke tuba ti yandi kele ya beno. Yandi kele ve mingi Katolika kuluta munu. Ya kele kieleks. Kasi beno ke tuba ti yandi kele ya beno.

⁷⁹ Beno tala Santu Francis ya Assise. Beno ke tuba ti yandi kele ya beno. Yandi kele ve mingi ya Katolika kuluta munu.

⁸⁰ Beno tala Jeanne d'Arc. Beno yokaka yandi na tiya na dikunzi, mutindu ndoki ya kento, samu yandi vwanda mona ba-vision mpe ti yandi vwandaka ya kimpeve. Beno nyengisaka yandi na pike. Mpe kento yina vwanda boka samu na kyadi, mpe ba yokaka yandi na tiya na dikunzi. Pene ya bamvula nkama na ntwala, ba me tala ti yandi vwandaka profete ya kento. Yandi vwandaka kisadi ya Nzambi. Oh, kieleka, beno me sala kitumbu ya nene: beno me timuna banzutu ya banganga-Nzambi mpe me losa yawu na kati ya nzadi.

⁸¹ “Beno ke bongisa bandyamu ya baprofete, mpe ke tula bawu na kati kuna.” Kieleka. Ata mbala mosi ve mutindu ya kusala ya dibuundu me basisaka ntete muntu ya Nzambi; ata mbala mosi ve ya me salaka, me sala ve bubu yayi, mpe ata mbala mosi ve ke sala. Ata mbala mosi ve ti nsambulu ya kubongisa me vwandaka dyambu ya ngudi ya Nzambi.

⁸² Dibuundu ya kubongisa ya kulutila ntama na yinza kele dibuundu ya Katolika; Luther, ya zole; na manima me kwiza Zwingli; na manima ya Zwingli, me kwiza Calvin; Calvin, me landa, ba-Anglican, baAnglo-Saxons me baka kisika, na manima dibuundu ya Anglicane; mpe Ntinu Henri ya Nana, ntangu yandi tulaka ntembe, mpe nyonso yina; mpe tii na ba-Méthodiste ya Wesley, mpe ba-Nazaréen, Bizyeti ya Busantu; mpe tii na nsuka, ya kele bantu ya Pantekote, bawu nyonso me bongisa. Mpe Biblia ke longisa mpwelele ti dibuundu ya Katolika kele kento ya luzingu ya yimbi, mpe ti mabuundu ya Misyoni mpe ba-organisation ya bawu kele bana ya yandi ya bakento, Apocalypse 17. Ya kele kaka kieleka. Na yawu bawu kele. . .

⁸³ Ve bantu, ntangu yayi. Ya kele na bantu ya mbote na mabuundu nyonso yayi; bantu ya santu, ya kuvulusa. Kasi Nzambi bokilaka ve bantu ya Yandi na nzila ya organisation. Yandi ke bokila bawu na kuvwandaka mosi na mosi. Nzambi ke salaka na mosi na mosi, kana beno kele Méthodiste, Baptiste, Protestant, mpe Katolika, to nyonso beno kele. Nzambi, ntete mbandukulu ya yinza, kuzabaka beno, mpe soolaka beno ntete samu na Luzingu ya Kukonda nsuka, to dyaka vwandaka na lukanu ya ntete na kuzimbana ya Kukonda nsuka. Ve . . .

⁸⁴ Yandi vwanda zola ve ti beno kufwa, ti beno kufwa. Kasi, Yandi na kuvwandaka ya kukondwa nsuka, Yandi zolaka zaba nsuka na mbandukulu, to Yandi kele ve Nzambi. Na yawu Yesu kwizaka ve na ntoto kaka samu na kutuba, “Mbote, Mu ke mona kana muntu ke vwanda na kyadi. . . Kana Mu sala mpe kufwa, na mutindu ya ngolo, kukondwa ntembe bawu ke banza, ‘Mbote, Mu. . .’ Ya ke—ya ke ndimisa bantima ya bawu, mpe bawu ke. . .” Nzambi ke salaka ve kisalu ya Yandi kutambula mutindu yina.

⁸⁵ Yesu kwizaka samu na lukanu mosi ya kieleka, ya kele, kuvuukisa bayina Nzambi, ntete mbandukulu ya yinza, kuzabaka ti ke vulusa. Yandi tubaka mutindu yina. Ya kele kieleka. Na yawu beno kele. . . “Ya kele ve landila yandi yina zola, to yandi yina ke kima; ya kele Nzambi yina ke lakisa kyadi.” Paul kutubaka yawu. Muntu mosi awa.

⁸⁶ Yandi tubaka, “Ya kele samu na yina Nzambi lendaka tuba, ntete Ésaü to Jacob kubutama ntete, Yandi tubaka, ‘Mu me zola mosi mpe me yina yankaka.’” Ntete ti mosi to yankaka ya bana ya bakala kubutama, Nzambi zabaka ti Ésaü vwandaka muntu ya mayela ya yimbi, mpe Yandi zabaka ti Jacob vwandaka. . . ti yandi zolaka buyaya ya yandi. Na yawu Yandi zabaka, ntete ba sala yinza, na yina me tala yawu. Ntangu yayi, beto ke mona na minuti mosi Nani yina vwandaka yina zabaka yawu. Kapu yayi kele na yawu.

Nzambi, . . . na ntangu ya ntama mpe na mitindu mingi zonzaka. . . na batata na nzila ya baprofete,

Kasi na bilumbu yayi ya nsuka ya me zonza na beto na nzila ya Mwana ya yandi, . . .

Me sala yinki? “Me zonza na beto na bilumbu ya nsuka yayi na nzila ya Mwana ya Yandi.”

⁸⁷ Ntangu yayi, wapi mutindu beno lenda banza na yawu, ti, wapi mutindu lenda vwanda profete? Beto lenda kuzwa profete kuna na kilumbu yayi? Kieleka. Yandi lenda zonza na nzila ya beto? Kieleka. Kasi yandi yina. . . Baprofete ya kilumbu ya ntama vwandaka Mpeve ya Yesu Klisto.

⁸⁸ Ntangu yayi, beto sungika yawu, samu ti mu ke na kubanza ti ya ke na kukota mbote ve. Ntangu yayi, yayi kele kaka mutindu Lukolo ya Lumingu, na yawu beto zola kuzwa yayi pwelele. Beno me mona?

⁸⁹ Beno tala. Beto baka Mpeve ya Nzambi yina vwandaka na kati ya Moïse, na bukieleka. . . ya vwanda tuba na ntwala na Yesu Klisto. Bantu nyonso ya Ngwisani ya Ntama vwanda tuba na ntwala kulunsi. Moïse, kubutamaka mwana ya kulunga, ya kubumba na kati ya matiti yina kele na lweka ya nzadi, ba katulaka na bibuti ya yandi, nyonso yina, mpe vwandaka. . . Yandi vwandaka ntinu, to ntwadisi, muntu ke yala bantu nyonso, muntu ke nwaninaka bantu, nganga-Nzambi. Nyonso yina ba tubaka ntete na Klisto.

⁹⁰ Beno tala Joseph, yina vwandaka ya kuzola na tata ya yandi, ya kuyina na bampangi ya yandi, mpe yina ba tekisaka kubika fyoti bapata makumi tatu ya mbongo. Yina ba losaka na kati ya dibulu, ba banzaka ti yandi kufwaka; ba basisaka yandi. Na kati ya kutalisa yandi mpasi, kapita ya malafu vuukaka, mpe muntu yina ke kufwaka bibulu kuzimbanaka; miyibi zole na kulunsi. Mpe kuna ntangu yandi kubasikaka, yandi basikaka na dibulu yina, mpe kwenda vwanda na diboko ya kibakala

ya Pharaon, mumbungu ya kulutila nene... yinsi yina lutila bayankaka nyonso ya yinza. Mpe muntu ve zolaka kwiza na Pharaon kana ti ba lutila na Joseph; Yesu ya kuvwanda na diboko ya bakala ya Nzambi, mpe muntu ve lenda kwiza na Nzambi kana ti na nzila ya Klisto. Mpe ntangu Joseph vwanda bika kiti ya kimfumu yina mpe vwanda basika, bantu vwanda kwenda na ntwala ya yandi, vwandaka boka mpe vwanda bula bampungi, vwanda wakisa mpungi, na kutubaka, “Beno fukama! Joseph ke na kwiza.”

⁹¹ Mpe ntangu Yesu ke kwiza, mpungi ke wakana, mpe konso dibolongo ke fukama, mpe konso ndinga ke funguna. Yinga, tata. Kuna Yandi vwandaka.

⁹² Mpe ntangu Joseph kufwaka, yandi bikaka yina ba ke banzilaka samu na bawu yina vwandaka vingila kukatuka na kimpika.

⁹³ Mu vwanda me tula diboko ya munu na nkela ya bamvumbi yango ya ntama, awa ntama mingi ve, ya vwandaka ya kusala na plomb. Mpe nzutu ya yandi zolaka vwanda... mikwa ya yandi... Yandi tubaka, “Beno zika munu ve awa, samu ti kilumbu, Nzambi ke kwiza tala beno.” Yandi vwandaka profete. “Nzambi ke kwiza tala beno.” Mpe tubaka, “Ntangu beno ke kwenda na yinsi ya nsilulu, beno baka mikwa ya munu.”

⁹⁴ Konso kiboba ya Hébreux, na bidimbu ya kubula na mukongo mpe na menga, zolaka tala nkela ya bamvumbi yango mpe kutuba, “Kilumbu, beto ke kwenda.”

⁹⁵ Yesu bikaka lubambuku, ntoni ya mpamba. Kilumbu ntangu beto ke kwenda na ndyamu, mpe baya beto ya luzolo, mpe kuwa mwa bikunku ya ntoto ya ntama, ntangu ba ke tuna, “Bombi ke vutuka bombi, mpe fundu-fundu na fundu-fundu, mpe ntoto na ntoto.” Kasi, mpangi, beto lenda mona ntama na mubu, na ndyamu ya mpamba. Kilumbu, beto ke basika awa. Beto ke na kwenda na Yinzó. Yandi ke na kwiza. Nyonso vwandaka kifwanukusu.

⁹⁶ Beno tala David, ba mangaka yandi na bantu ya yandi mosi, ba katulaka yandi na buntinu na bantu ya yandi mosi. Na kuvwandaka ntinu ya Jérusalem, ba basisaka yandi na Jérusalem na bantu ya yandi mosi. Mpe na yina yandi kwendaka na Mongo ya Olive, yandi talaka manima mpe dilaka. Ba mangaka yandi.

⁹⁷ Bankama nana ya bamvula katuka kuna, Mwana ya David, Ntinu ya Jérusalem, kuvwandaka na zulu ya mongo mpe dilaka, samu ti ba mangaka Yandi.

⁹⁸ Ya vwandaka Mpeve ya Klisto na kati ya David. Nyonso vwanda tuba na ntwala kulunsi. Baprofete na ntangu kuna vwanda zonza na Nkumbu ya Yandi. Ba zingaka na kati ya Nkumbu ya Yandi. Ba salaka na Nkumbu ya Yandi. Kieleka. “Nzambi na bantangu mingi mpe na mitindu mingi zonzaka na

batata na nzila ya baprofete, kasi na kilumbu ya nsuka yayi na nzila ya Mwana ya Yandi.”

99 Na yawu baprofete mpe bantu ya kimpeve, kilumbu yayi, kele kaka kulakisa ya Klisto. Na ntangu yina, na nzila ya musiku ba vwanda telamaka, vwanda talaka. Na lweka awa ba ke telama, ke tala manima na nzila yankaka, na nzila ya lemvo.

100 Ti na Hébreux 11, kapu ya nsuka, mu bantangu mingi ke kumiyufulaka yawu. Na kapu ya nsuka, kitini ya nsuka ya kapu ya 11 ya Hébreux, ntangu yandi ke zonzaka na yina me tala Abraham. kapu ya nene ya lukwikilu, mpe na nsuka, yandi tubaka, “Ba vwanda soba konso ntangu kisika ya kuzinga ya kulwata bilele ya mpusu ya mameme mpe ya bankombo, mpe bayina ba botula nyonso, mpe ba vwanda zengaka bawu na scie. Ba vwanda soba konso ntangu kisika ya kuzinga, kukondwa kisika ya kukwenda, ya kuyina, mpe ya kuvwenza, mpe yina ba vwanda talisa mpasi. Bayina, yinza yayi kele ve ya kulunga samu na bantu ya mutindu yina.”

101 Na manima Paul kutelamaka mpe tubaka, “Kasi kukondwa beto ba kele ve ya kulunga.” Samu ti bawu talaka kaka *na* kulunsi, kasi beto ke na kutala *na nzila* ya kulunsi. Beto ke na Mpeve ya Klisto na manima Yawu kukuma nsuni ya muntu mpe zingaka na kati ya beto. Beto ke kwiza awa na nzila ya Mpeve-Santu, yina kele kieleka dikani ya mbote.

102 Mpe bantangu yankaka mu ke kumiyufulaka yinki Buklisto ke vingila bubu yayi. Mulongi mosi ke kota na mbanza mosi yandi fwana vwanda. . . to yina kele na dibuundu mosi ya malu-malu to kisalu mosi ya malu-malu, ke kukibokila yandi mosi profete, yandi ke belama kuna, ke tuba, “Mbote, kana ba ke pesa munu mbongo mingi. Kana mu lenda kuzwa ditoma ya kulutula mbote. Kana ba ke . . . Kana difuta ya munu ke bwelama na manima ya konso ya bangonda sambanu.”

103 Beto fwana kuzwa ya kulutula mbote. Beto fwana kuzwa bayinzo ya kulutula mbote. Beto fwana kuzwa bilele ya kulutula mbote. Yinki beto ke sala ntangu beto ke telama na ntwala ya bantu yina vwanda soba konso ntangu kisika ya kuzinga, ya kulwata bilele ya mpusu ya mameme mpe ya bankombo, kukondwa kisika ya kulalisa bayintu ya bawu, vwanda soba konso ntangu kisika ya kuzinga na bantoto ya kuyuma? Mpe muntu mosi lenda seka beto mpe beto kele ya kukubama samu na kubika dibuundu mpe kuvutuka dyaka ve. Yinki Buklisto ke lomba bubu yayi. Beto fwana vwanda na nsoni ya beto mosi.

O Nzambi, tala beto kyadi.

104 Na kilumbu yina, Yandi vwanda zonza na nzila ya baprofete, kasi kilumbu yayi na nzila ya Mwana ya Yandi. Ya wandaka dyambu ya profete, kuna. Yayi kele Ndinga ya Mwana, bubu yayi. Oh, ti Nkumbu ya Mfumu kusakumuka!

¹⁰⁵ Na nzonzolo yankaka, kana beno ke na kutala na kinsinsya, dyabulu, beno lenda sala foti. Kasi Yayi me yela, foto kele pwelele. Ya vwandaka na nzila ya profete; yayi kele na nzila ya Mwana ya Yandi. Ya vwandaka na nzila ya negatif; yayi kele na nzila ya positif. Amen. Beno me mona yawu? Ya kele ve na mutindu ya kuzimbana. Ya kele kima ya positif, kilumbu yayi na nzila ya Mwana ya Yandi. Oh, mutindu ya kele kitoko!

*...yina yandi me tula kilandi...(Oh, la la!)...
kilandi ya bima nyonso,...*

¹⁰⁶ Yinki ya vwandaka? Ya vwandaka nsodolo. Oh, beno kuwa. Yandi vwandaka ya kusoola, Klisto vwandaka, kilandi ya bima nyonso. Oh, dyabulu zabaka yawu, katuka disamba ya Éden, beno me mona, ntangu dyabulu kuwaka Ndinga yango kuna kilumbu yina, na lusambusu ya bantu yango. Yandi tubaka, “Samu beno me katuka na fundu-fundu, na fundu-fundu beno ke vutuka; mpe Nkuna ya kento ke dyata yintu ya nyoka.” Nkuna ya nsilulu.

¹⁰⁷ Satana ntangu nyonso vwanda tala mbote na Nkuna yango. Ntangu Abel kubutamaka, yandi tubaka, “Nge yandi yayi, ya kele nkuna.” Mpe yandi kufwaka Abel. Mwana ya yandi, Cain, kufwaka Abel. Mpe na yina Abel kufwaka, yandi tubaka, “Mu me kuzwa nkuna.” Yandi kufwaka yandi. Yandi tubaka, “Mu me kuzwa yandi.” Kasi, lufwa ya Abel, mbutukulu ya Seth vwandaka mvumbukulu dyaka. Beno tala mbote mutindu ba kulandanaka.

¹⁰⁸ Mulonga yina ya Seth, ya kulandanaka, na bantu ya kulemvuka, ya kusungama; me landana tii na Énoch; me landana na Noé, tii nsuka ya lufwa yina landaka kifuluka ya maza.

¹⁰⁹ Beno tala mulonga ya Cain, ba kumaka bantu ya mayela mingi, yina me longoka, ya science. Biblia me tuba ve. . . Yesu kutubaka ve, ti, “Bana ya yinza yayi kele na mayela mingi kulutila bana ya Kimfumu”? Beno tala dyaka na lweka ya Cain bubu yayi: ya mayela mingi, ya kulongoka, yabantu ya ntembe, misambidi ya nene; beno me mona, misambidi ya nene, kasi bantu ya mayele, batungi, bantu ya nene.

¹¹⁰ Beno baka bantu ya nene. Beno tala Thomas Edison, bantu ya nene mingi. Beno tala Einstein, ditonzo ya yinza, mutindu ba ke bokila yandi, bubu yayi, mayela ya yinza. Kasi beto ke meka ve na kusadila bamayela. Beto ke bika Dibanza yina vwandaka na kati Klisto kuvwanda na kati ya beto, mpe kutala na Ndinga yayi, mpe kubokila yawu kieleka.

¹¹¹ Badokotolo ya budokotolo, ata ti beto ke zitisa bawu na nyonso yina kele na beto, kasi mingi ya bayina kele bantu ya ntembe, bayina kele ve ya kukwikama. Beno tala bantu ya mayela mingi mpe ya mayela bubu yayi. Ba kele na lweka yina na lweka kuna, na lweka ya Cain.

112 Kasi beno tala na ya kulemvuka mpe bantu ya lembami. Kuna kele dyaka mvumbukulu ya beno. Oh, Nkumbu ya Mfumu kusakumuna. Beno bawu yayi. Beno tala.

. . .yandi salaka yandi kilandi ya bima nyonso, na nzila ya yina mpe yandi me sala bayinza;

Nani salaka bayinza? Klisto. “Klisto salaka bayinza?” Inga, tata. Beto kwenda kaka mwa ntama dyaka.

Yina vwandaka kutalana ya nkembo ya yandi, mpe kulakisa ya kizizi ya mvwandulu ya yandi, . . .

Kutalana ya nkembo ya Nani? Ya nkembo ya Nzambi. Kulakisa ya kizizi ya Mvwandulu ya Nani? Ya Nzambi. Oh, mu zola yayi!

. . .to kulakisa kizizi ya bumuntu ya yandi, mpe kusimba bima nyonso na nzila ya ndinga. . .

Beno bawu yayi. Ndinga, yina ke simbaka bima nyonso. Yesu tubaka, na Matthieu 24, “Mazulu mpe ntoto ke luta, kasi Bandinga ya Munu ke luta ata mbala mosi ve.” Yandi ke simba bima nyonso.

113 Science ke meka na kukulula Yawu, mpe ke tuba, “Ya kele Buku ya ntama. Ba me bangula Yawu.”

114 Mpe dibuundu ya Katolika ya Rome, Bishop Sheen tubaka, “Ba me bangula Yawu bambala yiya to tanu, mpe beto lenda ve kusala na Yawu kivuvu. Beno lenda ve kuzinga na nzila ya Yawu kana beno fwana.” Kasi Yandi ke simba bima nyonso na nzila ya Ndinga ya Yandi. Amen. Ya kele yina mu ke banza na zulu ya Yawu. Mu ke kwikila Biblia.

. . .ndinga ya ngolo ya yandi, (ya kele na ngolo na kati ya Ndinga), ntangu yandi salaka na nzila ya yandi mosi kuvedisa ya masumu ya beto, . . .(beno tala awa) . . .me vwanda na diboko ya bakala ya kimfumu na mazulu;

115 Yinki Paul ke na kumeka na kusala? Yandi ke na kumeka na kulakisa ti Nzambi salaka lukanu ya bima nyonso na kati ya Klisto, mpe Klisto vwandaka kulakisa ya kizizi ya Nzambi. Nyonso yina me bikana na kapu yango ke lakisa na mutindu ti Yandi vwandaka ya kulutila Bawanzio, ya kulutila bangolo nyonso. Bawanzio vwanda sambila Yandi. Paul vwanda meka na kukembisa Yandi.

116 Ntangu yayi, mu zola kumeka. . . Kana mu kuma ntama ve kuluta yayi, yina ya yawu yina me bikana ke kembisa kaka Klisto. Yina Paul tubaka awa, mutindu na kapu ya 11, mpe nyonso na kuzonzila na yina me tala yinza. Yandi tubaka, “Na wapi—na wapi Wanzio ti Yandi tubaka, ‘Nge kele Mwana ya Munu, kilumbu yayi Mu me buta Nge?’” Beno me mona?

117 “Na nsuka ya yinza, ba ke kufwa. Yinza ke kufwa. Kasi. . . Mpe bima nyonso ya yinza ke kufwa. Yandi ke futika yawu

mutindu kazaka. Ya ke nuna, mpe ke soba, mpe ke zimbana. ‘Kasi Nge ke zinga. Nge ke zinga kukondwa nsuka. Nge kele Mwana ya Munu. Kilumbu yayi Mu me buta Nge, mpe ke kufwa ata mbala mosi ve, kele ya kuvwanda na diboko ya bakala ya Kimfumu.’”

Yinki zola kutuba *diboko ya bakala?* Ya kele ve, ti Nzambi ke na diboko ya bakala yina muntu kele ya kuvwanda na zulu ya yawu. *Diboko ya bakala* zola kutuba “ngolo mpe lutumu,” ke na lutumu na nyonso na Mazulu mpe na ntoto. Mpe Mazulu nyonso mpe ntoto kele ya kusala na nzila ya Yandi.

¹¹⁸ Ntangu yayi, Nani kele Bakala ya nene yayi, Muntu ya nene yayi, Klisto? Awa, Nzambi na kati ya Tata, Mwana, mpe Mpeve-Santu, ya kele ve. . . Ya kele butatu, kasi Yawu kele ve butatu ya bantu. Yawu kele butatu ya kusalu, ya Nzambi mosi.

¹¹⁹ Yandi vwandaka Tata yina vwanda twadisa bana ya Israël. Yina vwandaka kusalu ya Yandi, Yehowa ya nene Tata. Mpe Yandi zingaka na zulu ya ntoto, na nkumbu ya Mwana. Mpe ntangu yayi Yandi ke zinga na kati ya Dibuuundu ya Yandi, na nkumbu ya Mpeve-Santu. Banzambi tatu ve; Nzambi mosi na kati ya bisalu tatu: Tata, Mwana, mpe Mpeve-Santu.

Bantu ke meka na kusala Yandi Banzambi tatu ya luswaswanu, Nzambi Tata. Ya kele samu na yina, ba-Juif, beno ke lenda ata mbala mosi ve, beno ke lenda ata mbala mosi ve na kunata yayi na Juif, ve, yina ve. Yandi lenda ve. Yandi kele na musiku, ti, “Mu kele Nzambi Mosi.” Ya kele kaka Nzambi mosi.

¹²⁰ Na Afrika ba ke botikaka na mitindu tatu: ba ke botikaka mbala mosi samu na Tata, mpe mbala mosi samu na Mwana, mpe mbala mosi samu na Mpeve-Santu. Kusalu ya Lukwikilu ya Bantumwa, ba ke botika bambala tatu, na ntwala, samu na lufwa ya Yandi. Yina ba ke bokilaka Nsangu ya mbote ya Kulunga na Simu ya Wesete, to na Simu ya Esete, ke botika bambala tatu na manima, ke tuba ti Yandi . . . tii luzikulu ya Yandi.

Mpe yandi tubaka, “Ntangu Yandi kufwaka, Yandi kubwaka na ntwala.”

¹²¹ Yankaka tubaka, “Vingila. Nge fwana zika muntu na mukongo.” Kaka mwa bima ya mutindu ya kusala ya ntama, na yina, bawu nyonso zole kele na foti; bawu nyonso zole kele na foti, landila Masonuku.

Yayi kele Urim Thummim. Ya ke sukisaka dyambu.

¹²² Ntangu yayi, bika beto monikisa yawu na kizizi mpe kumona wapi—wapi mutindu ya kele, na nkokila yayi. Yawu yayi, kana beno zola kumona yawu. Na kati ya bamvula nyonso pene ya makumi zole na tanu yina mu me vwanda mulongi, mu me longukaka yawu. Mpe mu ke kumiyufulaka bantangu yankaka na makabu na kati ya dibuuundu. Yinki kele makabu yango? Profesi, kuzonza na bandinga, kutendula ya bandinga,

luzayikisu ya Kinzambi, nyonso yina, nyonso yina ke kwiza na nzila ya Klisto.

¹²³ Ntangu yayi beno tala. Klisto kele Yintu ya bima nyonso. Mpe Yandi kele Yintu ya Dibuundu. Mpe beno me mona ntete diama ya nene? Diama ya nene yina ba me zenga mbote, ya kele na mwa bitini yina me katuka na yawu, yina me zengana na yawu. Ya kele yina ke sala diama ya kulunga. Bitini kele samu na yinki? Diama ya tsyelika, mutindu ya kuzwa yawu, ba fwana nika; diama ya kieleka, ntangu ba ke mona yawu.

Mu vwandaka na Kimberly. Beno, mingi ya beno, yina kuwaka ti beno lenda lokota badiama na bala-bala, ya kele kieleka. Billy mpe munu, mpe Tata Bosworth. Mfumu ya bamine ya diama ya Kimberly, baka . . . Yandi vwandaka huissier ya munu na balukutakanu kuna. Mpe ba nataka beto kuna. Mpe kaka na ngaanda ya . . . Ba vwanda basisa yawu pene, oh, pene ya bametele bankama tanu na yisi ya ntoto. Ya ke basika, ditadi ya bleu, kima ya bleu ya nene, mutindu grès ya bleu yayi yina beto ke kuzwaka na kizunga awa. Mpe bantu ya kuna, ba ke fidisa bawu bametele bankama tanu na yisi ya ntoto, samu na kubasisa yawu, samu na kubika ntalu na zulu. Kana beno kwenda na nzadi kuna, ba ke keba na yawu bankama ya bakilometele. Kana beno baka kantini ya balitele makumi yiya, yandi tubaka, mpe ti beno kulokota yawu, ya kufuluka na—na zyelo, mpe kana beno lenda kwenda na yawu na yinzo, beno ke vwanda muntu ya kufuluka na mafuku ya mbongo, ya ke vwanda na badiama mingi na kati ya yawu. Kasi ba fwana sala mpe kubasisa yawu, samu na kubika ntalu na zulu samu na bawu.

¹²⁴ Ntangu yayi, diama, ntangu yawu ke basikaka, ya kele kaka kima ya nene, ya pete, ya mutindu selekele, mutindu, kitini ya ngalasi. Ya kele na diama ya bleu, diama ya ndombi, émerode, mpe diama ya pwelele, diama ya mpembe. Kasi ntangu ya ke basikaka . . . Na yina ntangu ba ke sala yawu mpe ke tula yawu samu na kusadila, ya kele na kitini ya diama yina fwana kukatuka. Mpe bitini ya yawu fwana kukatula na yawu. Ba ke zenga mwa bitini, samu ti, ntangu yawu ke kutana na nsemo mbala mosi, mutindu *yina*, ya ke pesa nsemo. Bitini, ya kele yina ke salaka kupesaka nsemo, landila mutindu ya kele ya kuzenga. Ntangu ya kele ya kutabula, ya kuzenga, mpe kuna, na yina ya kele, ya ke sala kupesaka nsemo. Mpe mosi ke pesa nsemo ya maza ya saka-saka, yankaka yina ke pesa nsemo ya bleu, mpe yankaka mu banza, nsemo ya émerode, mpe nsemo ya mbwaki. Mpe bansemo yankaka ke basika na yawu, mutindu bakulère ya mukyama. Ba ke bokilaka yawu, “tiya na diama.”

¹²⁵ Ntangu yayi, mosi na mosi ya bansemo yango ke monikisa makabu. Kasi ya kele, kaka, Klisto kele Diama. Mpe Yandi vwandaka Yandi Yina kwizaka, mpe yina ba dyataka, mpe yina lwalaka, mpe yina ba zengaka, samu ti Yandi kulenda na

kutalana Yandi mosi mutindu Nsemo na yinza. Yandi kele Diama yango ya Mfunu.

¹²⁶ Beno lenda banza, ntete ti ntoto kuvwanda, ntete ti nsemo kuvwanda, ntete ti mbwetete kuvwanda, ntete ti nyonso kuvwanda? Ya kele na Kiteko ya Nene yina vwanda basisa, ya Mpeve, mpe na Yinto ya masa yayi vwanda basika zola ya kulutila kuvedila, samu ti ya vwandaka ve na kima yina zolaka basika na yawu kana zola. Ntangu yayi, beto, yina beto ke bokilaka zola, bubu yayi, ya kele zola ya kubeba. Kasi kaka na yina beto ke kuzwa essence, to mwa fyoti ya zola yango na kati ya beto, ya ke sobisa dibanza ya beto nyonso.

¹²⁷ Na manima ya kuna me kwiza yinto yankaka, na Yinto ya masa ya mfunu yayi, Diama, mpe ba vwanda bokila yawu ludedomo, kieleka ludedomo. Ntangu yayi, ya kele samu na yina beto fwana kuzwa musiku. Ya kele samu na yina musiku fwana kuzwa lusambusu. Kana ata lusambusu ke landa musiku, musiku ke sala ata mbote ve. Mpe ntangu lusambusu kulutaka na nzila ya musiku, yina nataka lufwa, mpe ya vwandaka ve na yina zolaka futa kitumbu yina kasi Nzambi Yandi mosi. Mpe Yandi futaka kitumbu ya lufwa ya beto, mpe bakaka masumu ya beto na zulu ya Yandi, samu ti beto vwanda ludedomo ya Nzambi na nzila ya Yandi.

¹²⁸ Ntangu yayi, ntangu Bansemo ya nene yayi kubasikaka, to bansemo ya nene ya Kimpeve: zola, ngemba, ya kele nyonso yina ya vwandaka, Yawu. Ya vwandaka ve na ata mpasi. Ya vwandaka ve na kuyina ve—ve, to ata mayela ya yimbi; ya zolaka basika ve na Yinto ya masa yayi. Ya vwandaka Yehowa. Ya vwandaka Yehowa Nzambi. Mpe ntangu yayi, mutindu bantu ya théologie ke kubokilaka yawu, kumonika ya kimpeve kubasikaka na Yawu, yina ba vwanda bokila, na Masonuku, “Logos,” Logos yina basikaka na Nzambi. Ya kele mpasi na kutendula, kasi Yawu vwandaka kitini ya Nzambi.

¹²⁹ Ntangu yayi, beno tala yina kusalamaka. Oh! Beno lemvokila munu. Ntangu mu—mu—mu ke kuma kaka na yayi, yayi ke nata kaka munu mbala mosi kisika mu zola yawu. Beno me mona? Logos, mpe Yinto ya masa ya nene yayi, Yinto ya masa ya nene yayi ya Kimpeve yina kuzwaka ve mbandukulu to nsuka; Mpeve ya nene yayi kubandaka na kusala, na kivangu, mpe Logos yina basikaka na Yawu vwandaka Mwana ya Nzambi. Yawu vwandaka kaka nzutu ya kutalana yina Mpeve kuzwaka. Mpe Yawu vwandaka nzutu ya kimpeve, yina zola kutuba nzutu, mpe nzutu vwandaka mutindu muntu.

¹³⁰ Moise kumonaka Yawu ntangu Yawu lutaka . . . pene—pene ya ditadi. Mpe yandi talaka Yawu, tubaka, “Yawu ke talana mutindu manima ya muntu.”

Ya kele mutindu mosi ya nzutu yina beto ke kuzwaka ntangu beto ke kufwaka awa. “Kana tabernacle ya ntoto yayi me kufwa,

beto ke na mosi yina ke na kuingila.” Ya vwandaka Yawu. Mpe ya vwandaka nzutu ya kimpeve yina vwandaka Mwana ya Nzambi. Mwana yango, Logos yango, kumaka nzutu, samu ti beto vwandaka ya kutula na kati ya nzutu. Mpe nzutu ya kimpeve, Logos, kumaka nzutu, awa na kati-kati ya beto, mpe Yawu vwandaka kima yankaka ve kasi kisika ya kuzingila, samu ti Yinto ya masa nyonso yina kuzingaka na kati ya Yandi. Oh, beno me mona yawu? Yawu yayi. Ya vwandaka Yina, ti, na . . .

¹³¹ Beno tala awa. Beto luta ntangu yayi na nswalu nyonso na Hébreux, kapu 7, kaka samu na mwa ntangu ya—ya lemvo, kana Nzambi zola. Beto mona wapi mutindu ya ke talana awa. Abraham!

Bantangu yikwa me bikana na beto? Beto me bikana na baminuti kumi. Mbote mingi. Beto ke baka yayi, na manima beto ke manisa yawu na yina ke landila, na yina ke landila, to Lumingu, kana Mfumu zola.

¹³² Abraham vwanda vutuka na bitumba yina yandi nungaka ntinu.

Samu ti Melchisédek yayi, ntinu ya Salem, . . .

Bantu yikwa zaba kisika, nani, yinki Salem vwandaka? Jérusalem.

. . . ntinu ya Salem, mwana ya ntinu ya Nzambi ya zulu mingi, yina kutanaka Abraham na kuvutukaka na bitumba yina yandi nungaka bantinu, mpe sakumunaka yandi;

Beno kuwa.

Na yandi mpe Abraham pesa kikunku ya kumi ya nyonso; na ntete na nzila ya lutendulu keke Ntinu ya ludedomo, . . . na manima ya yawu dyaka Ntinu ya Salem, yina keke, Ntinu ya ngemba;

Ya kukondwa tata, ya kukondwa mama, ya kukondwa lubutuku, to dyaka ve mbandukulu ya bilumbu, to nsuka ya luzingu, . . .

¹³³ Ntinu mosi katukaka Salem, mpe kutanaka Abraham yina katukaka na bitumba yina yandi nungaka bantinu. Mpe Ntinu yayi vwandaka na tata ve, vwandaka na mama ve, vwandaka na mbandukulu ya bilumbu ve to nsuka ya luzingu. Nani Abraham kukutanaka? Ntangu yayi beno banza. Yandi vwandaka na tata ve; Yandi vwandaka na mama ve. Yandi ata mbala mosi ve vwandaka na kilumbu ti Yandi kubandaka, mpe Yandi ata mbala mosi ve keke na kilumbu ntangu Yandi ke suka, na yawu Ntinu mosi yango ya Salem fwana vwanda moyo bubu yayi. Amen. Beno me mona yawu? Ya vwandaka kumonika ya kimpeve yango yina vwandaka Mwana yango ya Nzambi. Wapi Salem? Jérusalem yango yina keke na Zulu, yina, Abraham, vwandaka ya kusakumuka, vwandaka sosa, kumona, vwanda meka na

kuzwa Mbanza yina Kiyidiki mpe Kitungi vwandaka Nzambi. Yandi vwanda soba konso ntangu kisika ya kuzinga ya kulwata bilele ya mpusu ya mameme mpe ya bankombo, bisika nyonso, ba kumaka bamputu, vwanda soba konso ntangu kisika ya kuzinga, mpe vwanda sosa Mbanza yina Kiyidiki mpe Kitungi vwandaka Nzambi. Mpe yandi kutanaka Ntinu ya Salem yango, yina vwanda kulumuka, mpe yandi futaka Yandi kikunku ya kumi ya bima nyonso yina yandi kuzwaka na bitumba. Amen. Ya kele Yandi. Oh, Mpangi Graham, ya vwandaka Yandi. Ya vwandaka Yandi.

Abraham kumonaka dyaka Yandi. Kilumbu mosi yandi vwandaka ya kuvwanda na kati ya tenta. Yandi talaka, nani vwandaka kwiza kuna, mpe yandi monaka bantu tatu vwandaka kwiza.

¹³⁴ Beno zaba, ya kele kaka na kima na yina me tala Muklisto, ti yandi ke zaba Mpeve ntangu yandi ke mona Yawu. Ntangu yandi. . . Yandi zaba kaka yawu. Ya kele kaka na kima ya Kimpeve na yina me tala yawu. Bima ya Kimpeve ke zabanaka na mutindu ya Kimpeve. Beno zaba. Inga, yandi lenda kaka tuba yawu, kana yandi kele kieleka ya kubutuka. “Dimeme ya Munu kuzaba Ndinga ya Munu.”

¹³⁵ Mpe yandi zabaka ti ya vwandaka na kima mosi. Yandi me kwenda na nswalu nyonso mpe yandi me tuba, “Kota, Mfumu ya munu. Vwanda. Telama mwa fyoti. Mu ke kwenda kuzwa kitini ya dimpa mpe kutula yawu na diboko ya Nge. Mu ke sukula makulu ya Nge. Pema, na manima landila nzila ya Nge, samu ti Nge—Nge me kwiza kutala munu.” Kuna na yinsi ya kukawuka, yandi bakaka nzila ya mpasi, nzila na ndambu ya bantu ya Mfumu yina ba me wenza.

Na yina, Lot vwandaka zinga na kati ya bimvwama, mwana-
nkasi na yisi kuna, kasi yandi vwandaka zinga na kati ya disumu. Ya kele yina bimvwama ke nataka na bantangu mingi ya kele disumu.

¹³⁶ Na yina Abraham nataka Bawu kuna, na yina yandi bakaka mwa maza mpe sukulaka makulu ya Bawu. Yandi me kwenda na nswalu nyonso na mwana ya ngombe, mpe me baka mwana ya ngombe ya nene na kati ya mameme, mpe me kufwa yawu; me pesa yawu na kisadi, samu na kuyidika. Mpe tubaka, “Sarah, bweta faline ya nge.”

Beno zaba yinki kubweta, ya kele, yina ya zola kutuba. Beno zaba, mama vwanda kuzwaka kima mosi ya ntama, mutindu spatule, yina yandi vwanda bumbaka na mbungu ya faline. Beno me mona ntete mosi ya yawu na kiyengosolo? Mpe beno vwandaka na spatule na kati kuna, beno ke kwendisana na ntuala faline, beno zaba; mpe ke kuma kilo mutindu *yina*, mpe kulutisa yawu, mutindu. Mu me monaka mama kusala yawu, bambala mingi, spastule, ke baka mwa kima mosi ya kubaluka yina

kele na mwa kiyengosolo ya kisengo na yawu. Yandi ke baka faline yango mpe ke yengisa yawu mutindu *yina*, beno zaba, mpe ke ningisa yawu mpe nyonso, mutindu *yina*. Na manima ke baka spatule mpe ke nangula yawu bisika nyonso, mutindu *yina*, samu na kubwisa yawu nyonso. Mpe ya vwandaka ntangu beto vwandaka kwenda mpe vwandaka nata faline ya beto na kinikunu ya ntama; mpe bambuma ya nene, beno zaba, ya kilo, beto vwanda sala dimpa ya disangu ya kieleka. Na yawu, beno lendaka pasula bankuni kilumbu ya muvimba.

¹³⁷ Na yawu kuna, yandi tubaka, “Bweta mwa faline, na nswalu mingi. Mpe sala ba-galette ya masangu kaka awa na zulu ya diziku, na nswalu mingi.” Mpe bawu kwenda bweta mabele ya ngombe mpe kuzwaka mwa miliki. Mpe bawu kuzwaka, salaka yawu barattage, mpe kuzwaka mwa manteka. Mpe kuna bawu kwendaka mpe kufwaka mwana ya ngombe mpe kuzwaka mwa musuni, mpe bawu kalingaka musuni. Bawu kuzwaka babeurre, dimpa ya masangu, mpe bawu kuzwaka mwa manteka samu na kutula na zulu ya ba-galette ya tiya. Oh, ya kele kieleka mbote. Mpe bawu tandaka yawu nyonso na zulu kuna. Mpe yandi nataka yawu na ngaanda, mpe me tula yawu na yisi na ntwala ya Bantu tatu yayi.

¹³⁸ Mpe na yina Bawu vwanda kudya, Bawu vwanda landa kaka na kutala na lweka ya Sodome. Mpe na manima ya mwa ntangu fyoti, Bawu me telama mpe me banda na kukwenda. Mpe Yandi tubaka, “Abraham...” Yandi tubaka, “Nge ke bumbila munu yawu ve.”

¹³⁹ “Mu lenda ve kubumbila nge yina Mu ke sala. Mu ke na kwenda na yisi kuna. Masumu ya Sodome me kwiza na makutu ya Munu.”

Muntu yina vwandaka nani? Fundu-fundu na zulu ya bilele ya Yandi, mpe vwandaka ya kuvwanda kuna vwanda kudya musuni ya mwana ya ngombe, mpe kunwaka miliki ya ngombe ya kento, mpe kudyaka galette mosi ya dimpa ya masangu, mpe na mwa manteka. Nani kele Muntu ya nzenza yayi? Zole, to tatu ya Bawu, ya kuvwanda kuna. Fundu-fundu na zulu ya bilele ya Yandi. Oh, inga, “Beto me katuka Yinsi mosi ya ntama.” Inga, ntama mingi. Mpe na yawu Yandi tubaka... Mbote, Banani Bawu vwandaka?

¹⁴⁰ Yandi tubaka, “Mu lenda ve kubumbila Abraham, na kumonaka ti yandi kele kibyadi ya ntoto.” Amen. “Mu ke monikisa ya Munu,” na nzonzolo yankaka, “na bayina kele bilandi ya ntoto.” Ya kele kisika Dibuuundu fwana vwanda bubu yayi. Ya kele kieleka. Kuzwa Mansweki ya Nzambi, kuzaba mutindu ya kukutika nzutu, mpe mutindu ya kusala, mpe yina ya kusala, mpe mutindu ya kudyata, mpe mutindu ya kuzinga. Beto kele bilandi ya ntoto. Kieleka. Yandi ke monikisa Yawu na

beno, samu ti Yandi lenda ve kubumba kima mosi. Ya kele samu na yinki beto ke na kutala mbote bima yayi kusalama.

Yinza ke tuba, “Ah, ya kele nkonga ya bafanatiki.” Beno bika bawu kutuba yawu. Kibyadi ya ntoto zaba bima yayi. [Kisika ya mpamba na bande—Mu.]

. . . samu ti ba ke bokila bawu bana ya Nzambi.

Kyese na bawu yina kele ya ntima pima: samu ti bawu ke byadila ntoto.

Yandi ke sala mambu ya kubumbama ya Yandi kuzabana na bawu, ke monikisa yawu na bawu, ke lakisa bawu yinki ya kusala mpe wapi mutindu ya kuzinga, ke bika bima ya yinza; ke tambula na mutindu ya kinzambi mpe ke zinga na mutindu ya kinzambi, na kati ya yinza ya bubu yayi, ke tambula na Yandi nzila nyonso. Beno bika yinza kutuba yina bawu zola.

¹⁴¹ Na yawu Yandi tubaka, “Mu lenda bumba ve kinsweki yayi na Abraham, samu ti, na kumonaka yandi kele bilandi ya ntoto. Kasi,” Yandi tubaka, “Mu ke na kwenda na yisi samu na kubebisa Sodome. Mu ke na kwenda na yisi.”

¹⁴² “Yinki nge ke sala, Tata? Wapi kisika Nge me katuka? Nyonso yayi kele samu na yinki?”

¹⁴³ Beto me mona ti, Yandi tubaka, “Mpe kima yankaka, Abraham, nge me vingila bamvula makumi tanu samu na nsilulu yayi yina Mu me pesaka nge. Nge me kuzwa ba-couche nyonso, ba-épingle mpe nyonso, samu na bébé yayi, bamvula makumi zole na tanu me luta. Nge ke na kuvingila dyaka na Munu. Ntangu yayi Mu ke kwiza tala nge, kaka pene ya ntangu ya luzingu, landila, ntangu ya luzingu, ngonda yina ke landa Mu ke vwanda na nge.”

¹⁴⁴ Mpe Sarah, na manima na kati ya tenta. Mpe Muntu yayi vwandaka na mukongo ya Yandi ya kubaluka na tenta, vwanda zonza na Abraham, mutindu yayi. Mpe Sara me sala, “Huh!”

¹⁴⁵ Yandi tubaka, “Yinki me sala ti Sarah kuseka?” Ho-ho-ho! Wapi mutindu samu na yina? Ya vwandaka mwa mabanza ya bantu, mutindu yina ve? “Yinki salaka ti Sara kuseka?”

Sarah tubaka, “Ve. Mu me seka ve.”

¹⁴⁶ Yandi tubaka, “Oh, yinga, nge me seka.” Yandi vwandaka na boma. Yandi vwanda tekita. Nani vwandaka Yina, zolaka zaba yina yandi vwanda sala na manima na kati ya tenta? Ya kele Nzambi Yina mosi yina kele na beto bubu yayi. Yina mosi. Yandi zaba nyonso na yina me tala yawu. Beno me mona? Yandi ke monikisa kaka yawu mutindu nsatu ya beno kele. Beno me mona?

¹⁴⁷ “Yinki nge me seka?” Beno me mona, mukongo ya Yandi ya kubaluka. Biblia me tuba yawu, ti, “Mukongo ya Yandi vwandaka ya kubaluka na tenta.” Kasi, Yandi zabaka yawu.

“Yinki yandi, na manima kuna, ke na kusalaka *yayi*?” Nge me mona? Na yawu, Yandi tubaka, “Mu ke kwiza kutala nge.”

148 Nani kele Muntu ya nzenza yayi? Beno zaba yinki kusalamaka? Yandi me katuka kuna mpe me zimbana. Mpe Biblia ke tuba ti Yawu vwandaka Nzambi ya Ngolo nyonso, Yehowa, Yinto ya masa yango ya nene, Kumonika ya kimpeve yango, Logos yango.

149 Mulongi mosi kutubaka na munu, kilumbu mosi me luta, yandi tubaka, “Mpangi Branham, nge ke banza kieleka ve ti ya vwandaka Nzambi, mutindu yina ve?”

150 Mu tubaka, “Biblia ke tuba ti Yawu vwandaka Nzambi, Elohim.” Yina, Yandi vwandaka Nzambi ya Ngolo nyonso, El Shaddai, ya kele kieleka, Mupesi-Ngolo, Yina ke kuyukutisa bantu nyonso. Amen.

151 Oh, mu ke kumitala musambidi! Beno banza na yawu. Awa kele, Yandi kele. Ntangu yayi mu ke lakisa beno Nani Yandi kele awa, na manima beno ke mona Nani Mwana kele. Ya vwandaka Yesu, ntete Yandi kuzwa Nkumbu ya kimuntu, “Yesu.”

152 Bawu vwandaka ya kutelama kuna na yinto ya masa kilumbu yina. Mpe bawu nyonso vwanda kunwa, beno zaba, mpe, “Vwanda kuzwa maza yina vwandaka na ntoto ya kuyuma,” mpe bima mutindu yina. Yandi tubaka . . . Bawu vwanda kudya mani mpe bima. Bawu tubaka, “Batata ya beto kudya mani na ntoto ya kuyuma, bamvula makumi yiya.”

153 Yandi tubaka, “Mpe bawu kele, mosi na mosi, ya kufwa.” Yandi tubaka, “Mu kele Dimpa ya Luzingu yina me katuka na Nzambi, na Mazulu. Yandi yina ke kudya Dimpa yayi ke kufwa dyaka ve.”

154 Bawu tubaka, “Mbote, batata ya beto kunwaka na Kimpeve, na Ditadi ya kimpeve yina vwandaka na ntoto ya kuyuma, yina vwanda landa bawu.”

155 Yandi tubaka, “Mu kele Ditadi yango.” Nkembo! Santu Jean, kapu 6.

“Kasi,” bawu tubaka, “yinki?”

“Yinga. Ya kele kieleka.”

156 “Kasi,” yandi tubaka, “Nge me . . . Nge me lungisa ntete ve bamvula makumi tanu.” Kieleka, kimalu ya Yandi salaka Yandi kutalana mwa ya kukula, kasi Yandi vwandaka kaka na makumi tatu. Bawu tubaka, “Nge kele ve muntu me luta bamvula makumi tanu, mpe nge ke tuba ti nge monaka Abraham, yina kufwaka bankama nana to yivwa ya bamvula? Beto me zaba ntangu yayi ti nge kele dyabulu.”

157 Yandi tubaka, “Ntete Abraham kuvwanda, MU KELE.” Yandi yayi. Nani vwandaka MU KELE? Nkumbu ya ntangu nyonso samu na bansungi nyonso. Ya vwandaka . . . Dikunzi

yango ya Tiya na divunda ya tiya, “MU KELE YINA KELE.” Kuna Yandi vwandaka, Kumonika ya kimpeve yango yina Yandi salaka awa, ya kubokila Mwana ya Nzambi, MU KELE, Jéhovah.

¹⁵⁸ Thomas tubaka, “Mfumumu, lakisa beto Tata mpe ya ke sepedisa beto.”

¹⁵⁹ Yandi tubaka, “Mu me vwanda mingi na beno, beno zaba Munu ve?” Yandi tubaka, “Ntangu beno ke mona Munu, beno me mona Tata. Samu na yinki kutuba, ‘Nge, lakisa beto, Tata?’ Munu mpe Tata kele Mosi. Tata ya Munu ke zinga na kati ya Munu. Mu kele kaka tabernacle ya kubokila Mwana. Tata ke zinga na kati ya Munu. Munu ve ke salaka bisalu, ya kele Tata ya Munu yina ke zingaka na kati ya Munu. Yandi ke salaka bisalu, Munu ve.”

¹⁶⁰ Ntangu yayi, ya kutelama dyaka, na manima kuna, Moise kumonaka Yandi, manima ya Yandi, yandi tubaka, “Vwanda talana mutindu mukongo ya muntu,” Logos yina basikaka na Nzambi.

¹⁶¹ Na manima yinki kusalamaka? Yayi vwandaka Nzambi. Mpe nsasa Yandi kukumaka katuka Logos na muntu. . . Yinki. . . ? Wapi mutindu. . . ? Yinki kusalamaka na yina? Baminuti tanu ntefe yina, Yandi vwandaka. . . Yandi vwandaka Logos. Kasi yinki Yandi kusalaka? Yandi telemisaka kaka diboko. . .

¹⁶² Ntangu yayi, banzutu ya beto kele ya kusala na bima kumi na sambanu ya yinza. Beto zaba yawu. Ya kele ya kusala na pota sse, mpe—mpe—mpe mwa calcium, mpe—mpe pitiloyi, mpe nsemo ya yinza, mpe ba-atome, mpe nyonso yankaka yina. Nyonso ya kuvukisa kintwadi, mpe ke sala nzutu yayi, yina ke katuka na fundu-fundu ya ntoto. Beno ke kudya madya. Nayina beno ke kudya madya, ya ke baluka na. . . me katuka na fundu-fundu, mpe ya ke katuka na fundu-fundu, mpe yawu ke landila kaka—kaka mutindu yina. Nsuni ya beno, nsuni ya beno na mutindu ya kele, ya kele ve na luswaswanu na mpunda, to na ngombe ya kento, to kima yankaka. Ya kele dyaka kaka nsuni.

¹⁶³ Mpe, bakala, beno ke pesa lukumu nsuni; kasi mpeve yina ke na moyo na kati kuna, mpangi ya munu. Ya kele kieleka. Kasi nsuni ya beno kele kaka fundu-fundu ya ntoto, mutindu kibulu. Nsuni ya beno kele ve ya kulutila na niama. Mpe kana beno ke lula yina ya nsuni mpe bima yina beno ke mona, ke lula bakento, ke lula bima nyonso ya mutindu yayi, ya kele dyaka kibulu. Ya kele kieleka. Ya kele kieleka. Beno zolaka sala yawu ve. Mpeve ya Nzambi ke twadisa beno ntama mingi mpe ke tula beno na kitezo ya kulutila zulu na yina. Ya kele kaka kieleka.

¹⁶⁴ Ntangu yayi, mpe awa, Kumonika ya kimpeve ya nene yayi ya kutelama kuna. Yinki. . . Yehowa yango ya nene Nzambi, beno zaba yinki Yandi tubaka? Yandi telemisaka kaka diboko mpe bakaka diboko mosi ya ba-atome, bakaka mwa nsemo, mpe

tsyamunaka yawu na kati, mutindu *yayi*, me sala, “Fiou,” nzutu mosi, mpe me kota kaka na kati ya yawu. Kaka yina.

165 Yandi tubaka, “Kwiza awa, Gabriel,” Archange ya nene yina. Me sala, “Fiou.” “Kota na kati ya *yawu*.”

166 “Kwiza awa, Michel,” Mbazi na lweka ya Yandi ya bakala. “Fiou.” Samu. . . “Nge kota na kati ya *yawu*.”

167 Nzambi, mpe Bawanzio zole, kutambulaka awa na kati ya nsuni ya muntu, mpe kunwaka miliki ya ngombe ya kento, kudyaka manteka yina ba salaka na miliki, mpe kudyaka dimpa mosi ya masangu, mpe kudyaka musuni ya mwana ya ngombe. Bawanzio zole mpe Nzambi. Biblia ke tuba mutindu yina. Ya kele Melchisédek, yina Abraham kukutanaka, na kukatukaka na bitumba yina yandi nungaka bantinu. Ya kele Mwana ya Nzambi.

168 Na kukwendaka na ntwala, awa na Hébreux, 7, ya ke tuba, “Kasi kele mutindu Mwana ya Nzambi.” Yandi *yayi*. Yandi salaka bima nyonso na nzila ya Yandi. Mpe Yandi me vutuka kuna, mpe me balula kaka fundu-fundu yina mbala mosi dyaka na fundu-fundu, mpe me vutuka mbala mosi na Nkembo.

169 Mpe Bawanzio, ntangu kaka yina Bawu vulusaka Lot mpe Mama Lot, kasi yandi vwanda landila na kutala na manima. Yandi tubaka, me tuba na bawu na kusala dyaka ve yawu. Mpe Bawu me vutuka mbala mosi na—na Mvwandulu ya Nzambi.

170 Ntangu *yayi*, wapi mutindu ya kivuvu ya nene kele na beto na Lukwikilu ya nene *yayi* yina beto ke sadila na nkokila *yayi*! Nzambi ya moyo, Yehowa, Dikunzi ya Tiya, kele na beto. Ke lakisa Yandi mosi na ngolo, mpe na kisalu, mpe ke kembila. . . Ti bawu baka Foto ya Yandi, Jéhovah kaka mosi. Mwana ya Nzambi yina katukaka na Nzambi, yina vutukaka na Nzambi, mpe yina ke zinga na kati ya Dibundu ya Yandi ntangu nyonso. Yandi *yayi*.

171 Yandi kele na bankumbu ya beto na Buku ya Yandi, na kudyaka ndefi na Yandi mosi, samu ti ya vwandaka ve na mosi ya kulutila nene na yina yandi Yandi zolaka kudyaka ndefi, ti Yandi ke vumbula beto na kilumbu ya nsuka. “Yandi yina ke kudya Nsuni ya Munu, mpe ke kunwa Menga ya Munu, kele na Luzingu ya kukonda nsuka, mpe Mu ke vumbula yandi na kilumbu ya nsuka. Yandi yina ke kwiza na Munu, Mu ke tula bawu na ngaanda ve. Yandi yina ke kuwa Ndinga ya Munu, mpe ke kwikila na Yandi yina fidisaka Munu, kele na Luzingu ya seko, mpe ke luta ata mbala mosi ve na lufundusu, kasi me luta lufwa na Luzingu.”

172 Yandi yina kaka lendaka telemisa kaka diboko mpe kubaka diboko mosi ya calcium mpe potasse, kusala, “Fiou,” mpe kuna beno kele dyaka. Mpe nkumbu ya munu kele na Buku ya Yandi. Ho-ho! Ho-ho-ho-ho! Yinki ya lenda sala munu na yina mapeka

ya munu ke na kubwa, mutindu mu ke na kununa? Kieleka ve. Mu ke vwanda na boma ve.

¹⁷³ Mpangi Mike, mosi ya bilumbu yayi, kyese na ntima ya nge, mpangi, ntangu mpungi ya nene yina ke kwiza, ke wakana, mpe ti Joseph yango ke belama. Alleluia! Yandi ke tuba, “Bana!” “Fiou.” Kuna beto ke vwanda, ya kusala na mutindu ya Yandi; ntwenya kukondwa nsuka, kununa me manisa; kubela, bampasi, mawa me zimbana. Nkembo vwanda na Nzambi ya moyo!

¹⁷⁴ Ya kele na Yandi ti Yandi ke na kuzonzila, bubu yayi, Mwana ya Yandi. “Na bantangu ya ntama mpe na mitindu mingi Yandi kuzonzaka na nzila ya profete, kasi na kilumbu ya nsuka yayi na nzila ya Mwana ya Yandi, Klisto Yesu.” Yandi ke zonzaka na konso ntima ya muntu yina Yandi me bokila. Kana beno me kuwaka ntete ve na nzutu Ndinga ya Yandi to kuwa Yandi kukonkota na ntima ya beno, lemvo beno pusa Yawu ve na manima.

Beto sambila.

¹⁷⁵ Tata ya Mazulu, na nkokila yayi, na yina beto kele na kyese mingi na kuzaba, na nzibudulu ya Mukanda yayi ya Hébreux, mutindu Paul me vutuka mbala mosi na kati ya Bansangu ya mbote. Yandi zolaka kaka ve kubaka yawu na zulu ya kuwakutuba to na zulu ya nzingulu mosi. Yandi zolaka ti beto kuzaba yina vwandaka Kieleka. Mpe yandi vutukaka mbala mosi na kati ya Bansangu ya mbote, mpe yandi. . . me vutuka na kati ya Ngwisani ya Ntama, Nsangu ya mbote yina longamaka na bawu. Mpe yandi monaka, na nzila ya Ngwisani ya Ntama kuna, binsinsya nyonso mpe bifwanukusu. Ya kele samu na yina beto kele na Buku ya nene yayi ya Hébreux na nkokila yayi. Mpe beto ke mona Yawu, Mfumu, mpe beto zola Yawu. Mpe na nzila ya bansungi, ba me yoka Yawu na tiya, tsyamunaka Yawu, ba mekaka na kuzimbisa Yawu, kasi Yandi ke na kulandila kaka mutindu mosi. Samu ti Nge tubaka, “Mazulu mpe ntoto ke luta, kasi Bandinga ya Munu ve.”

¹⁷⁶ Na manima muntu ya ntembe ke tuba, “Mbote, beno ke tuba, ‘Paul kusunikaka yayi.’” Paul ve, kasi Nzambi yina vwandaka na kati ya Paul; Muntu yina ke vangaka yina vwandaka na kati ya Paul.

¹⁷⁷ Kaka mutindu na kati ya David, ntangu yandi tubaka, “Mu ke bika ve Muntu ya Munu ya Santu kumona kupola, to dyaka Mu ke bika moyo ya Yandi na kati ya difelo.” Mpe Mwana ya Nzambi kubakaka Bandinga yango yina katukaka na profete yina, mpe me kwenda mbala mosi na kati ya misopo ya difelo. Mpe tubaka, “Benobebisa tabernacle yayi, mpe Mu ke vumbula Yawu na bilumbu tatu.” Mpe Yandi salaka yawu, samu ti Ndinga ya Nzambi lenda kondwa ve; ata dibete mosi ve lenda kondwa. Mutindu beto ke tonda Nzambi samu na yayi, Urim Thummim yayi ya nene, mpe na kuzaba ti bimbangi ya beto na nkokila yayi,

Mfumumu, ke na kupesa nsemo kaka na Biblia yayi awa! Beto kele ya kubutama ya malu-malu, ke na Mpeve-Santu.

¹⁷⁸ Nzambi ya luzolo, kana ya kele na bakala to kento na kati awa na nkokila yayi, mwana ya bakala to mwana ya kento, yina me pesaka ntete ve kimbangi yayi, wapi mutindu bawu lendaka vumbuka kana ya kele ve na Luzingu na kati kuna? Oh, bawu ke tuba, “Mu ke na Luzingu.”

¹⁷⁹ Kasi Biblia ke tuba, “Kento yina ke zinga na kati ya kilengi kele ya kufwa na yina yandi kele moyo. Nge ke tuba nge ke na Luzingu, kasi nge kele ya kufwa. Nge ke fwanisa,” me tuba Biblia, “ti nge ke na Luzingu, kasi nge kele ya kufwa. Nge ke tuba ti nge kele mvwama mpe ke na nsatu ya kima ve; kasi zaba ve ti nge kele na bampasi, mpe kele mputu, mpe kimpene, mpe mpofo, mpe nge zaba yawu ve.” Mpe ya kele mutindu ya mabuundu na nkokila yayi, Mfumumu. Mutindu bawu ke kondwa bima ya nene yayi, ya luvalu.

Na kuzaba ti Yehowa Nzambi ya nene, Yina lenda kaka basisa na . . . Yandi tubaka, “Benoni natila Munu mwa bambisi yina.” Yandi zolaka baka mbisi samu na—na kusala kima mosi na yawu. Na kulakisaka, ti mvumbukulu zolaka vwanda kima mosi, na kusala kima mosi. Yandi salaka kaka ve bambisi, kasi Yandi salaka bambisi ya kulamba, mpe mampa ya kulamba. Mpe Yandi disaka mafunda tanu ya bantu na mwa bambisi tanu . . . mwa mampa mpe bambisi zole. O Mfumumu, ya vwandaka na maboko ya Yandi, mpe Yandi vwandaka Kiyidiki. Kasi Yandi zolaka kuzwa kima na diboko ya Yandi.

Nzambi, ti beto kumipesa beto mosi na maboko ya Yandi, na nkokila yayi, mpe kutuba, “O Nzambi, baka munu mutindu mu kele. Mpe ntangu nsuka ya luzingu ya munu kele awa, ti mu kwenda na kivuvu ti ya vwandaka na kati ya munu, na kuzabaka ti mu butamaka na mbala zole, mpe ti Mpeve ya Nge me pesa kimbangi na munu, mpe me pesa kimbangi na mpeve ya munu, ti mu kele mwana ya Nge ya bakala, to mwana ya Nge ya kento.” Mpe na kilumbu yina ya nsuka, Nge ke vumbula bawu. Pesa yawu, Tata.

¹⁸⁰ Mpe na yina beto kele na bayintu ya beto ya kukulumusa, ya kele na muntu yina zola kutelemisa diboko ya yandi, kutuba, “Bambuka moyo na munu, Mpangi Branham, na bisambu. Mu zola Nzambi kuzaba munu ntangu . . . ntete mu bika ntoto yayi, ti Yandi ke zaba munu mbote ti Yandi ke bokila munu na nkumbu. Mu ke pesa mvutu.” Nzambi kusakumuna nge mwana ya bakala. Nzambi kusakumuna nge, mpe nge; mpe nge, kento. Muntu yankaka? Benoni telemisa kaka diboko ya benoni. Benoni tuba, “Sambila samu na munu, Mpangi Branham.” Ya kele yina beto ke sala. Nzambi kusakumuna nge, ntwenya ya kento. Ya kele mbote.

181 Ntangu yayi, na yina yintu ya beno kele ya kuyinika, na bisambu, mu ke yimba nzila ya nkunga yayi:

Kulula ve bimvwama ya mpamba ya yinza,
Ya ke lutaka na nswalu nyonso,
Tunga kivuvu ya nge na bima ya Seko,
Yawu ke luta ata fioti ve!

Kangama na diboko ya Nzambi yina ke sobaka
ve!

Kangama na diboko ya Nzambi yina ke sobaka
ve!

Tunga kivuvu ya nge na bima ya Seko,
Kangama na diboko ya Nzambi yina ke sobaka
ve!

182 Na yina yandi ke na kubula ntangu yayi, mpe yintu ya beno ya kukulumusa, beno zola kaka kutelemisa diboko ya beno, kutuba, “Yinga, Mfumu, ya munu yawu yayi”? Yinki ya ke sala? Ya ke lakisa ti mpeve ya beno, na kati ya beno, me baka lukanu. “Mu zola diboko ya Nge, Mfumu.” Nzambi kusakumuna nge, mwana ya fyoti ya kento. “Mu ke telemisa diboko ya munu.” Nzambi kusakumuna nge, mwana ya fyoti ya kento, na yisi awa. Ya kele mbote, chérie. Nzambi, nge zaba, kele na kyese na kumona nge kusala yawu. “Beni bika bana ya fyoti kukwisa na Munu.”

183 “Mu zola, Nzambi, ti Nge simba diboko ya munu. Mpe na kilumbu yina, mu zola kuvwanda na kati ya diboko ya Nge; ti, ntangu Nge ke bokila, mu ke kwiza.” Yinga, mutindu vwandaka Lazare. Nzambi kusakumuna nge, mpangi ya kento.

Ntangu nzyetolo ya beto ke suka,
Kana na Nzambi beno me vwanda kieleka,
Yinzo ya beno ya kitoko na Nkembo,
Moyo ya beno ke yangalala na kumona.

Yinki beno ke sala ntangu yayi, na yina?

Kangama na diboko ya Nzambi yina ke sobaka
ve!

Kangama na diboko ya Nzambi yina ke sobaka
ve!

Tunga kivuvu ya nge na bima ya Seko,
Kangama na diboko ya Nzambi yina ke sobaka
ve!

184 Tata ya Mazulu, maboko mingi me telama, na mwa lukutakanu yayi, na nkokila yayi, ti bawu zola kukangama, na nkokila yayi, na diboko ya Nge ya Seko, yina ke sobaka. Na kuzabaka ti bayina kupesamaka na Nge. . . Nge tubaka, “Mu. . . Nyonso yina Tata me pesa Munu ke kwiza na Munu, mpe ata mosi ya bawu ke zimbana. Mpe Mu ke vumbula bawu na kilumbu ya nsuka. Ke kufwa ata mbala mosi ve, ke luta ata mbala mosi ve na lufundusu, kasi kele na Luzingu ya Kukonda nsuka, ya Kukonda

nsuka.” Mpe ya kele kaka na Luzingu mosi ya Kukonda nsuka. Ya ke katuka kaka, na Nzambi. Ya kele Nzambi. Mpe beto me kuma kiti ya Nzambi, mingi dyaka ti beto kele bana ya babakala mpe bana ya bakento ya Nzambi. Ntangu beto kele na Mpeve ya Nzambi na kati ya beto, beto ke banza mutindu Nzambi. Beto ke banza na ludedomo mpe na busantu, mpe beto ke meka na kuzinga na kuyangidika Yandi.

¹⁸⁵ Pesa, Mfumu, ti mutindu yina ya Luzingu ke kota na konso muntu yina me telemisa diboko ya bawu. Mpe bayina zolaka telemisa maboko ya bawu, mpe me sala yawu ve, mu ke sambila ti Nge ke vwanda na bawu. Pesa yawu, Tata. Mpe ntangu nzyetolo ke suka, luzingu me manisa, ti beto kota na ngemba na kilumbu yina, na Yandi, kisika beto ke vwanda dyaka ve ya kununa, ke vwanda dyaka ve ya kubela, ke vwanda dyaka ve na mpasi. Tii ntangu yina, bumba beto na kilengi mpe na kyese, na kukumisaka Yandi, samu ti beto me lomba yawu na Nkumbu ya Yandi. Amen.

¹⁸⁶ Beno nyonso mikwikidi, ntangu yayi, beto telemisa maboko ya beto mpe beto yimba nkunga yango.

Kangama na diboko ya Nzambi yina ke sobaka
ve!

Kangama na diboko ya Nzambi yina ke sobaka
ve!

Tunga kivuvu ya nge na bima ya Seko,

Kangama na diboko ya Nzambi yina ke sobaka
ve!

¹⁸⁷ Ntangu yayi beto yimba yawu yinwa ya kukangama. Na yina beno ke na kusala yawu, na mpangi ya beno, beno tuba, “Nzambi kusakumuna nge, mpangi.” Beno pesa maboko na muntu yina kele ya kuvwanda pene-pene ya beno. “Nzambi kusakumuna nge.” Na balweka nyonso zole ntangu yayi. Na balweka nyonso zole, beno pesa maboko. “Nzambi kusakumuna nge, mpangi. Nzambi kuvwanda na nge.” “Beno tungisa bivuvu ya beno na bima ya Seko.”

Doc, mu zaba ti ya kele kuna, mpangi-bakala. Mu zaba ti nge me lutila kuna, Mpangi Neville, bilumbu me luta.

Ntangu nzyetolo yayi ke suka,

Ya ke salama, mosi ya bilumbu yayi.

Kana na Nzambi beto me vwanda kieleka,

Beto ke mona Mpangi Seward Kuna.

Yinzo ya beno ya kitoko na Nkembo,

Moyo ya beno ke yangalala na kutala.

Kangama na diboko ya Nzambi yina ke sobaka
ve!

Mu zola kusambila yango, na manima ya nsangu.

Kangama na diboko ya Nzambi yina ke sobaka
ve!

Tunga kivuvu ya nge na bima ya Seko,
Kangama na diboko ya Nzambi yina ke sobaka
ve!

Ntangu kele ya kufuluka na nsobolo ya nswalu,
Ya ke na kima mosi ve na ntoto yina ke soba ve,
Tunga kivuvu ya nge na bima ya Seko,
Kangama . . .

Beto sosa na kumona Yandi, Muntu yango yina ke monana ve
na kati-kati ya beto ntangu yayi, mpe beno kembila Yandi kaka
ntangu yayi na yina beto ke yimba.

Kangama na diboko ya Nzambi yina ke sobaka
ve!

Kangama na diboko ya Nzambi yina ke sobaka
ve!

Tungisa kivuvu ya nge na bima ya Seko,
Kangama na diboko ya Nzambi yina ke sobaka
ve!

Ngemba! Ngemba! Ngemba ya Kitoko mingi,
Beno yimbila kaka Yandi ntangu yayi.

Na kukulumukaka . . .

Nsangu me manisa. Ya kele kusambila.

Mwangana na zulu ya mpeve ya beto ntangu
nyonso, mu ke sambila

Na bimpo ya zola yina ke nanguka.

Beno bika Yandi kufulusa beno maza.

Ngemba! Ngemba! Ngemba ya Kitoko mingi,
Kukululumukaka na . . .

Yinto ya masa yango ya nene, Yawu ke na kufunga.

. . . na zulu;

Mwangana na zulu ya mpeve ya beto ntangu
nyonso, mu ke sambila,

Na zulu ya bimpo ya zola yina ke nanguka ve.

Ya me sala kaka kima mosi ve?

. . . Ngemba ya kitoko mingi,

Na kukulumukaka na Tata ya beto na Zulu;

Mwangana na zulu ya mpeve ya beto ntangu
nyonso, mu ke sambila,

Na zulu ya mimpo ya zola yina ke nanguka ve.

Ya kele ve na kima mosi na Yawu, yina kele kaka mvwama
mpe lembami?

¹⁸⁸ Mu ke kumiyufula kana ya kele na muntu ya kubela yina
zola ti ba kusa mpe kusambila yandi. Kana ya kele, beno baka

kaka kisika. Yayi keke kento na fauteuil roulant kuna? Beno bika kaka yandi kuna. Mu ke kwiza, sambila yandi. Yandi ke vwanda na nsatu ya kubika kiti ve. Yankaka?

Oh, beno zola kaka ve kitini yayi ya lukutakanu? Bantu yikwa ke kuwa na nzutu, zaba kaka ti Mvwandulu ya Nzambi keke awa? Ya keke yina mu vwanda zonza. Yina mosi . . . Beno ke kuwa kaka na nzutu mutindu . . . Bantu yikwa ke kuwa na nzutu mutindu ti beno zola kaka kuboka? Ntangu yayi beto mona kaka. Ke mona kaka mutindu ti kima na kati ya beno zola kuboka. Beno me mona?

Ya keke ngemba! Ngemba! Ngemba ya kitoko
mingi,

Na kukulumukaka na Tata ya beto na Zulu;
Mwangana na zulu ya mpeve ya munu ntangu
nyonso, mu ke sambila,

Na zulu ya bimpo ya zola yina ke nanguka ve.

Pesa nsemo na zulu ya munu,

¹⁸⁹ Na yina beto ke na kusambila, beto ke kusa bantu ya kubela ntangu yayi, mpe kusambila samu na bawu. Beno zola kwandi ve kukwiza mutindu yayi, kento?

¹⁹⁰ Yinki yayi zola kutuba? “Bisambu ya lukwikilu ke vuukisa muntu ya kubela.” Muntu nyonso na kati ya bisambu ntangu yayi, beno yimba kaka nkunga yango na yinwa ya kukangama. Beno banza na Yesu ke na kubelusa bantu ya kubela.

Pakula yandi mafuta . . . ? . . .



HEBREUX, KAPU MOSI KNG57-0821

(Hebrews, Chapter One)

BANDANDANI YA BUKU YA BA-HEBREUX

Nsangu yayi ya Mpangi William Marrion Branham, kulongamaka na Kingelesi, Na Kilumbu ya tatu na nkokila, na kilumbu ya 21 ya Ngonda ya nana, na mvula 1957, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org